

'Dhebhawunta 'sëédhe

'ö Zan -ya =been 'ö =ne

1 ¹Pë 'ö =been' -sü 'ka 'sëédhe -be 'ö =ne -a 'gü 'ö tɔɔ pë -nu 'wo dho kë -dhekpaɔ =dhia' -bha 'ö -Zlan -ya -wun -lo Yesu Klito kwɛɛ kö -yaan -a -zɔn 'ö -bha yuökème -nu -dhë. Klito -ya -zɔn 'ö bɔa 'ö -bha yuökème Zan 'gü, -Zlan -bha bɔme -bɔ -a -dhë -sü 'ka. ²Pë -nu 'ö Zan -ya yö =ne 'ö -bleɛ. 'Wun 'ö -bleɛ' -na zö =ne 'ö tɔɔ 'wun -nu 'wo go -Zlan 'piö waa- 'wun gia- 'ö Yesu Klito -ya -zɔn. ³=Zuögludhi -yö kë mɛ 'ö 'sëédhe -be 'ö =ne 'ö 'dhoë- -a pö -a -gɔ! =Zuögludhi -yö kë mɛ 'ö 'dhoë- 'ö 'to to -Zlan 'dhi -wo 'ö =ne -a -bha, kö pë -nu 'wo -ya =ne -yaan -bhlë -ya -a -gɔ! Bhii 'töng 'ö -ya -sü 'ka kö pë -nu 'wo =ne -waan kaa bhë -ya yö =klöö'.

-Wekadhe 'ö dho Yesu -wun -dhe 'wun gia- -mɛ -nu -dho 'kuë- -sü 'slaple 'piö

⁴⁻⁵Ma Zan =ne 'ö 'sëédhe =ne 'a- bɔ Yesu -wun -dhe 'wun gia- -mɛ -nu -dho 'kuë- -sü 'slaple 'ka Azi -se 'gü ka -dhë: 'Ka =büee. -Zlan 'ö -kë -dhö, 'ö =tun -dhö, 'ö dhö nu 'dhö, -zuu 'slaple 'wo- -bha 'gɔ -gbloo 'dhiö 'dhö, waa- Yesu Klito 'ö kwa =goo- -towogüstüzé 'ka, Gbö -bleezé, 'yö mɛ -bleezé 'yö go ga 'gü -a 'ka, 'yö mɛ =va 'ka -gludë -nu 'wo 'kpongtaa zö -an -ta, -wo 'glusë waa- =zuöyagluu 'ö go -an 'piö -an kë ka 'ka. Yesu Klito =ne 'ö kwa -dho -ya -kë, 'yö kwa dha kwa -bha =sɔɔn yaa -nu -gɔ, -ga kwa -wun 'gü -sü 'ka. ⁶'Ö 'kwa -kë 'ö -bha -gludédhe -pö 'gü -mɛ -nu, slabhome -nu 'ö 'kwa dho yuö kë -a Dë -Zlan -dhë -an 'ka. 'Tɔbhɔdhe waa- 'piigbeedhe -wo kë Yesu Klito -bha 'ka =toëpö 'ka! (Amen!)

⁷-Ka -dhe -ga, -yö nu -na dha kpö -nu -ta; mɛ -nu 'saadhö 'yan -dhö -da -a 'gü; mɛ -nu gia- 'wo- zɔa 'dü 'ka bhë -an 'yan -dhö dɔ -a -bha 'pö. 'Següme -nu 'saadhö -wo -dho 'gbo -nu bɔ wo -de =maa' -sü 'ka -a -wun 'gü. Pë 'ö -de dho kë yö -mü. Amen.

⁸Kwa Dëme -Zlan 'piigbeezé, 'ö -kë -dhö, 'ö =tun -dhö, 'ö dho nu bhë =ne 'ö 'wun =bleɛ 'ö- pö: «Ma =ne 'a 'wun 'plɛ züɔdhe waa- -a 'dhiötodhe 'ka.»

Zan -bha 'yanpiöpë 'ö -gban Klito -bha -a -sü

⁹N tɔɔ Zan; a ka dheglu 'ka, 'ö 'kwa Yesu 'gü do; ma =ne 'ö 'klobhɔdhe 'ö -gban -Zlan -bha -gludédhe -wun -bha, 'a ka 'piö do -a wo -sü 'gü, -dɔ

-a -gɔ -sü 'ka -zuösaadhe 'gü bhë. 'Yiziëndhe 'wo- -dhe Patemɔsö 'a -ya -a -bha =ne, -Zlan -wo waa- 'wun gia- 'ö -kë -bɛen' -sü 'ka 'ö Yesu -ya yö -dhegbeadhe 'gü bhë -an =blɛɛ' -'a- wo bhë =ne 'ö 'wo n kun -a -wun 'gü 'wo nu n 'ka zö =ne. ¹⁰Dëme -bha yi 'ka a -kë mü 'ö -Zuu 'slööslö -yö pa n 'ka, 'ö 'a -wo do ma n -zlöö =zian'. 'Ö -wo bhë 'ö -kë 'gbee- 'ka =ne =dhe 'wo 'truu -piö -a -bha 'kpa -a 'dhö. ¹¹-Wo bhë -ya pö: «Pë -nu 'ü 'dhoë- yö =ne -a =bɛen' 'sëédhe -be do 'gü, kö 'sëédhe -be bhë 'ü- bɔ Yesu -wun -dhe 'wun gia- -mɛ -nu -dho 'kuë- -sü 'ö Efezö, 'ö Simiinë, 'ö Pɛɛgamë, 'ö Tiatii, 'ö Saadö, 'ö Filadɛfi waa- -a mɛ 'ö Laodise -an -dhë. -An -dho 'kuë- -sü -yö 'slaple.»

¹²'A =dhië n -zü, 'a -dhe -ga n =zlöö kö mɛ 'ö 'wun =blɛɛ' -na n -dhë bhë 'aan- yö. 'Ö 'a =labang -dɔatapë 'slaple 'ö 'sënnng 'ka -a yö. ¹³Kö pë do 'ö bhɔ mɛ 'bhee- -bha -yö dɔ -sü 'ka -an ziën. Gblang do =gbiin 'ö nu 'ö yö -a -gen kpöödhö -yö -kë -a -bha; 'sënnng -du kwi -yö ziö -sü 'ka -a -kënnng 'gü. ¹⁴-A -bha wun -nu -wo kë 'puu =ne 'bhla kaa- 'puu 'dhö =ne 'yɔɔ 'dhö, 'ö- 'yan -nu -wo bhü =ne 'siö 'dhö. ¹⁵-A -gen -nu -wo -bhü =ne zën 'wo- bho 'ö 'wo- -kë 'drëëndrën -a 'dhö; 'ö- 'we -wo -zuö -kë =va -kɔ -yö -kë =ne 'yi -zuö -drinnng 'dhö. ¹⁶'Susongga 'slaple -wo -kë -a =kwɛɛ- 'gü -kɔ 'gü 'ö -dhaa 'dhiözë 'ö- 'dhiö 'dho zian =plɛ 'ka 'ö go -a dhiö. -A wöödhe -yö -bhü =ne -kɔ 'ö lan- 'dho 'bhü -na -a 'ka, kö =ya dɔ 'dhëë ziën bhë -a 'dhö. ¹⁷-Dhe 'ö n 'yan -yö -da -a 'gü, 'a -püö -a =geendhö =ne mɛ =ya ga -a 'dhö. 'Yö 'ö =kwɛɛ- 'gü -kɔ sü 'yö- -da n gban -ta -a pö -sü 'ka =nɛɛ: «Kö -kun 'ö 'suö -yö ü -kë! Ma 'a tɔɔ mɛ -blɛɛzë; ma 'a tɔɔ mɛ -kaanta. ¹⁸Ma 'a tɔɔ mɛ 'ö 'bhee-; a -ga, 'kɛɛ =dɛɛ =ne -a 'gü bhë, a 'bhee- -toëpö 'ka zlöö. -Kɔ -mɔ 'wuën- -sü -yö n -gɔ ga waa- =glööbɔɔdhe -an -ta. ¹⁹Pë -nu 'wo kë -na =ne waa- pë -nu 'wo dho kë -an 'piö 'ü -an yö -na =ne, -bhö -a -ya 'sëédhe 'gü! ²⁰-Dhe -ga 'zü, 'susongga 'slaple 'ü- -ga -na n =kwɛɛ- 'gü -zian' =ne waa- 'sënnng =labang -dɔatapë 'slaple -wun =ne -an -gen 'ö -bin -sü 'ka 'wo =ne: 'Susongga 'slaple 'ö 'wo =ne 'wo tɔɔ -Zlan -bha yuökëme 'slaple 'wo 'dhiö -sü Yesu -wun -dhe 'wun gia- -mɛ -nu -dho 'kuë- -sü kpö 'slaple 'wo bhë -an 'ka -mɛ 'ka bhë -an -bha. 'Ö =labang -dɔatapë 'slaple 'wo =ne 'wo Yesu -wun -dhe 'wun gia- -mɛ -nu -dho 'kuë- -sü kpö 'slaple bhë -an 'ka.»

**'Sëédhe 'ö dho Yesu -wun -dhe 'wun gia- -mɛ
-nu -dho 'kuë- -sü 'ö Efezö -a 'piö**

2 ¹-Dhe 'ö pë -nu 'wo bhë =yaa- -gen -nu pö n -dhë 'dhö, 'yö- pö 'zü: «-Bhö 'sëédhe bɔ Yesu -wun -dhe 'wun gia- -mɛ -nu -dho 'kuë- -sü 'ö Efezö bhë -a -dhë 'ü- pö -a -dhë =nɛɛ: Mɛ 'ö 'susongga 'slaple 'dhoë- =kwɛɛ- 'gü =zian', 'ö 'ta 'sü -sü 'gü =labang -dɔatapë 'slaple 'wo 'sënnng 'ka -an ziën bhë -ya -pö: ²Pë -nu 'ü- kë -na 'töüdhö bhë a- -dɔ. A =sëëbhodhe waa- =zuösaadhe 'wo 'ü 'gü bhë -a -yö. A- =dɔa' =ne kaa- 'gluyaame -nu ka këwun -nu 'waa do; mɛ -nu 'wo wo -de -dhe -na Yesu -bha bɔme -nu 'kɛɛ 'waa- 'ka

bhë, ü -an 'piö -ga, 'ö 'ü- yö -ne =suame -mü -an 'ka. ³-Zuö' kē -saa -sü -yö ü -gɔ; ü 'yënnɔ -yö -bhɔ n -wun 'gü 'ö -faan' yaa 'go ü 'gü. ⁴'Kee pē 'ö n -zuē ü buëndhö 'ö -nɛ: N -dho 'yaa ü -bha gbɔ -nɛ -kɔ 'ü- zü dɔa bhë -a 'dhö. ⁵Ü -zo -yö -büö -dho 'ö -kē ü 'gü 'dhiö =zian' n buëndhö 'ö 'bha ü -kwaal- -a -zü bhë -a -wun 'ka! Dɔ 'ö 'kwa- wo =dɛɛ -nɛ, -bhö ü kē -kɔ -ga 'dhe! 'Go ü bha -sɔɔn yaa -nu 'gü, 'ü -dhiē! -Zlan 'piö, 'ü 'wun -nu kē -nɛ -kɔ 'ü- -kaa' 'dhiö -bleezē 'ka bhë -a 'dhö. 'Ö =ya kē -nɛ ü 'ka 'go ü -bha -sɔɔn yaa -nu 'gü, a -dho nu ü -gɔ 'a ü bha -labang -dɔatapē bho piën-. ⁶-Yö 'dhö, 'kee 'wun me 'ö n -zo 'kun -wun 'ka ü buëndhö 'ö tɔɔ: Pē 'ö Nikolaitö -nu 'dho -a kē -na bhë ü- -san -zē -nɛ n 'dhö 'pö.

⁷Kö me 'ö- 'wun ma -to 'dhö -dhö, pē -Zuu 'slööslö 'dhoē- -bleē' -na Yesu -wun -dhe 'wun gia- -mɛ -nu -dho 'kuē- -sü -dhë -nɛ -ya ma.

Me -nu 'wo 'dhoē- to -a 'gbee- 'ka, a -dho -këdhösü -lü bhe 'ö -Zlan -bha 'teepadhe -bha -a nu -an -dhë, 'wo- -bhö.»

**'Sëédhe 'ö dho Yesu -wun -dhe 'wun gia- -me
-nu -dho 'kuē- -sü 'ö Simiinē -a 'piö**

⁸'Yö- pö: «-Bhö 'sëédhe bɔ 'dhiö -sü -Zlan -bha me -nu 'ka -mɛ 'ö Yesu -wun -dhe 'wun gia- -mɛ -nu -dho 'kuē- -sü 'ö Simiinē -a 'gü bhë -a -dhë -nɛɛ: Me 'ö ga, 'ö =ya 'go ga 'gü 'ö 'wun 'plɛ züɔdhe waa- 'wun 'plɛ 'dhiötodhe 'ka bhë, -ya -pö: ⁹A ü -bha 'yënnɔbhɔdhe -dɔ; 'a ü bha 'fɛedhe -dɔ. A- -pö 'dhö 'kee giagia 'ka ü -bhɔɔzē! 'Wun 'ö me -nu 'wo wo -de -dhe Zuifö -nu 'ö 'waa Zuifö 'ka 'wo- =bleē' -na ü -gɔ bhë a- -dɔ. Dü -bha me -nu -mü. ¹⁰Kö -kun 'ü -suö ü 'yënnɔ 'ö 'dhoē- bhɔ bhë -a -wun 'gü! Ü 'to 'to: 'Ö tɔɔ ka -dho -da 'güɔandhe 'gü, dü -bha ka kpö 'gü -mɛ -nu 'bhaa -nu -da -kansa 'gü -sü 'ka; ka 'klo- -dho bhɔ -dhekpɔyɪ 'gɔɔ- do 'piö. 'Kee -bhö 'to -klu -sü 'ka -Zlan -bha -yö 'dho -yö yöē ü -bha ga -yi -bha; a -dho ü gbaa kē -a 'gü -sü 'gɔ =gblaa' 'ö dho -a -zɔn -nɛ ü -to -a 'gbee- 'ka bhë -a 'ka.

¹¹Kö me 'ö- 'wun ma -to 'dhö -dhö, pē 'ö -Zuu 'slööslö 'dho -a -bleē' -na Yesu -wun -dhe 'wun gia- -mɛ -nu -dho 'kuē- -sü -dhë -nɛ -ya ma. Me -nu 'wo 'dhoē- to -a 'gbee- 'ka bhë, ga kē =plɛ -naa yaa 'dho nu -an -ta.»

**'Sëédhe 'ö dho Yesu -wun -dhe 'wun gia- -me
-nu -dho 'kuē- -sü 'ö Pɛɛgamē -a 'piö**

¹²'Yö- pö 'zü: «-Bhö 'sëédhe bɔ 'dhiö -sü -Zlan -bha me -nu 'ka -mɛ 'ö Yesu -wun -dhe 'wun gia- -mɛ -nu -dho 'kuē- -sü 'ö Pɛɛgamē -a 'gü bhë, -a -dhë -nɛɛ: Me 'ö -dhaa 'dhiözē 'ö- 'dhiö 'dho zian =plɛ 'ka 'yö- kwɛɛ bhë -ya -pö: ¹³A ü këdhe -dɔ; yö kun tɔɔ -dhe 'ö dü -bha 'gɔ -gbloo 'dhoē- -bha -a! 'Kee ü 'ka ü bo -zo -yö n -ma -sü 'ka; bhii ü -to -klu -sü 'ka n -ma -sē 'ka, 'töng gia- -de 'ö n =goo- 'ö 'yaa 'kan n -ma 'wo- -dhe Antipasö bhë 'wo- zaa plöö, -dhe 'ö dü 'dhoē- -bha bhë -a -bha. ¹⁴'Kee -a -kē 'dhö -sü 'ka 'wun do -yö n -zuē ka buëndhö: Me -nu -wo ü =plöö 'ö 'wo -klu -sü 'ka Balaamö

-bha me =daan' -wo -bha. Bhii Balaamö -yö -gleng -nu -da Balakö -zuö' 'piö kö -ya kédhe =mæ'- -yaan Izlaelö -me -nu -da =sɔɔn yaa 'gü wü 'wo wo -bha gbpäpë -nu gba -na 'ka bhë -a -bhö -sü 'ka; 'go mü 'wo wo -de nu =sɔɔn kē -sü -dhë. ¹⁵-Kɔ do bhë =nɛ 'ö me 'bhaa -nu 'dhoë- 'ka ü =plöö 'ma 'ö 'wo 'to -sü 'ka Nikolaitö -nu 'wo -kē gbpäpë 'vlanvlan gbame -nu 'ka bhë -an kēpë -nu 'piö. ¹⁶-Dhe 'ö 'pö, -bhö 'go ü bha =sɔɔn yaa -nu 'gü! 'Yaa 'pö a -dho nu ü -gɔ yi 'bhaa 'ka, 'a 'ko -zë me -nu 'wo 'dhö bhë -an 'ka (n -wo 'ö -kē) -dhaa 'ö 'go -na n 'dhii -a 'ka bhë -a 'ka.

¹⁷Me 'ö- 'wun ma -to 'dhö -dhö, 'wun 'ö -Zuu 'slööslo 'dhoë- =blæ' -na -Zlan -bha me -nu -dhë bhë -ya ma!

Me -nu 'wo 'dhoë- to -a 'gbee- 'ka, a -dho 'manë 'ö -bin -sü 'ka bhë -a nu -an -dhë, 'go mü 'a dho -guö kpö 'puu, 'ö me 'ö -dhö 'ö- 'tɔ 'dho -ya -sü 'ka -a -ta -a nu -a -dhë. 'Tɔ -dëü gbe 'ö me gbe yaa- dɔ, -a 'ke yaa kē me 'a- nu -a -dhë bhë -a 'ka 'ö dho kē -ya -sü 'ka -guö kpö bhë -a -ta yö -mü.»

**'Sëédhe 'ö dho Yesu -wun -dhe 'wun gia- -me
-nu -dho 'kuë- -sü 'ö Tiatii -a 'piö**

¹⁸'Yö- pö 'zü: «-Bhö 'sëédhe bɔ 'dhiö -sü -Zlan -bha me -nu 'ka -me 'ö Yesu -wun -dhe 'wun gia- -me -nu -dho 'kuë- -sü 'ö Tiatii bhë -a 'piö =woë' =næ: -Zlan Gbö 'ö- 'yan 'dho 'bhü -na =nɛ 'siö 'dhö, 'ö- -gen -nu 'dho 'bhü -na =nɛ zën 'wo- bho 'wo- -kē 'drëëndrën -a 'dhö bhë -ya -pö: ¹⁹A ü këyuö -nu -dɔ; ü -bha -Zlan waa- me -nu -an -dho kē -sü -nu, ü -bha -zo yö -sü -nu, ü -bha -to -klu -sü 'ka -Zlan -bha -sü -nu, ü -bha -kē =naazë -sü waa- ü -bha yuö -kaanta =plëézë 'ö -ziö -an -blæzë -ta bhë a -an 'plë -dɔ. ²⁰'Kee pë 'ö n -zuë ü buëndhö 'ö tɔɔ: Dhe bɔ 'wo- -dhe Zezabelö 'ö- pö ö -de -dhë ö -Zlan -wodhiölodhe 'ka bhë -a 'to 'ü- wo ka ziën bhë yaa kē n -dhë -së. -Yö ma yuökëme -nu -daan =sɔɔn kē -sü 'ka. -Ya -pö -an -dhë 'zü wü 'wo gbpäpë -nu gba -na -a 'ka bhë, -wa -bhö. ²¹A 'töng -nu -a -dhë kö -yaan 'kan =sɔɔn yaa kē -sü -bha, 'ö yaa 'pa ö -deë kö -yaan ö =kwaa'- ö -bha =sɔɔn kē -sü -zü bhë. ²²-Dhe 'ö 'dhö, a -dho -a kē 'ö yö 'dhö waa- me -nu 'wo =sɔɔn bhë 'wo- 'gü 'wo dho sia- 'yua 'ka, -a 'ke waa wo bo wo wɔ -kɔ yaa -nu 'wo bhë -an 'ka. ²³A -dho -a -bha 'në -nu zë, -yö kē 'dhö kö Yesu -wun -dhe 'wun gia- -me -nu -dho 'kuë- -sü -nu 'saadhö -wa dɔa =nɛ a me 'ö me -nu -bha -zo -ta -a 'gü -wun waa- -an =dhoɔbhaapë -nu dɔ -a 'ka. 'Kee kē- wo 'dhö bhë -yö kē ka 'yaan =nɛ me 'ö -dhö ka ziën, -kɔ 'ö 'dhoë- pë -nu kaa bhë =nɛ 'a dho -a -saan' bhoë.

²⁴-Zlan -bha me -nu, me 'ka to Tiatii =ya kē ka -bha 'ka, kaa 'to -an -bha me =daan' -wo 'ö bhë -a 'piö, 'ö pë 'ö me -nu -wa -dhe Satan -bha -gleng -wun -nu 'piö =gbiinzë 'wo -bin -sü 'ka 'ö kaa- =daan'- bhë, a- -pö ka -dhë, n 'ka 'dho -wo -zuöatadhe 'waa gbe kē gbɔ. ²⁵'Kee pë me -nu 'ö 'wo ka -gɔ ka -bha -zo yö -sü 'gü bhë, -kaa -an 'kun 'gbee- -yö 'dho -yö yöë n nu -yi -bha. ²⁶⁻²⁷Me 'ö 'dhoë- to -a 'gbee- 'ka, 'go mü 'zü 'ö 'dhoë- ö -zo kē ma yuö

kë -kɔ -nu 'wo -nɛ -an 'piö, a -dho -wogbiindhe nu -a -dhë 'segɔgüme -nu -ta. -Yö -dho 'dhiö sü -an 'ka -piö 'gblɔngblɔn do 'ka; 'go mü 'yö dho -an -wüü' -nɛ -kɔ 'wo gbɔ 'sɛ kpö -wüü' -na -a 'ka bhë -a 'dhö -nɛ -kɔ 'ö -kɔ -mɔ 'wuën -sü 'ö go n Dë 'piö 'ö- 'ka n -gɔ bhë -a 'dhö. ²⁸A -dho -dhiadhio 'susongga nu -a -dhë.

²⁹Kö me 'ö- 'wun ma -to 'dhö -dhö, 'wun 'ö -Zuu 'slööslö 'dhoë- -blee' -na Yesu -wun -dhe 'wun gia- -mɛ -nu -dho 'kuë- -sü -dhë bhë -ya ma.»

**'Sëédhe 'ö dho Yesu -wun -dhe 'wun gia- -mɛ
-nu -dho 'kuë- -sü 'ö Saadö -a 'piö**

3 ¹Yö- pö n -dhë: «-Bhö 'sëédhe bɔ 'dhiö -sü -Zlan -bha me -nu 'ka -mɛ 'ö Yesu -wun -dhe 'wun gia- -mɛ -nu -dho 'kuë- -sü 'ö Saadö bhë -a -dhë -nɛɛ: Pë 'ö me 'ö -Zlan -bha -Zuu 'slaple waa- 'susongga 'slaple 'dho -a -gɔ 'ö- -blee 'yö -nɛ: Pë -nu 'ü- kë -na 'saadhö bhë a- -dɔ. A- =dɔa' -nɛ me -nu -wo ü ga -nɛ me 'ö 'bhee- -a 'dhö, 'kɛɛ kö ü ga -sü 'ka. ²Bhö -büö, 'ü -dɔ genngdhö -sü nu me -nu 'wo =tun ü -gɔ, 'ö =wa kë 'tëëtë bhë -an -dhë kö -kun 'wo dho ga. Bhii 'ma- yö -nɛ ü bha yuö -nu 'ü- kë -na bhë -a gbe 'yaa -yö 'ko 'dhiö -sü 'ka n ma -Zlan wö 'dhiö. ³Ü -zo -yö -büö me -daan' -wo 'ü- ma bhë -a -wun 'ka! 'Go mü ü -zo -yö -büö 'zü -an ma -kɔ 'ü -an maa bhë -a 'ka. -Bhö 'wun ma me -daan' -wo bhë -a -ta, 'ü 'kan ü bha -sɔɔn yaa -nu bhë -an -bha. -A 'ke ü 'ka -büö 'gbeedhö, a -dho nu ü tii 'ka -nɛ -kwaanme -yö nu. ⁴Kɛɛ kë- wo 'dhö bhë, ü -bha me 'bhaa -nu 'wo Saadö -dhe gia- -bha, waa wo -bha sɔ -nu kë -dhiizë. -Wo -dho kë n 'piö sɔ 'puu -kë wo -bha -sü 'ka. Bhii 'ö tɔɔ -yö -an -ma -kun kö -wo kë 'dhö. ⁵Me -nu 'wo 'dhoë- to -a 'gbee- 'ka, -kɔ bhë -nɛ 'wo dho sɔ 'puu bhë -a -daa' wo -bha 'pö, n 'ka 'dho -an 'tɔ bho -kë -a 'gü -sü 'sëédhe -be 'gü; a -dho -a pö n Dë waa- ö -bha bɔmɛ -nu 'dhiö -nɛ -wo n -ma 'ka.

⁶Kö me 'ö- 'wun ma -to 'dhö -dhö, pë 'ö -Zuu 'slööslö 'dhoë- -blee' -na Yesu -wun -dhe 'wun gia- -mɛ -nu -dho 'kuë- -sü -dhë -nɛ -ya ma!»

**'Sëédhe 'ö dho Yesu -wun -dhe 'wun gia- -mɛ
-nu -dho 'kuë- -sü 'ö Filadæffi -a 'piö**

⁷Yö- pö n -dhë 'zü -nɛɛ: «-Bhö 'sëédhe bɔ 'dhiö -sü -Zlan -bha me -nu 'ka -mɛ 'ö Yesu -wun -dhe 'wun gia- -mɛ -nu -dho 'kuë- -sü 'ö Filadæffi -a -dhë -nɛɛ: Mɛ 'ö 'slööslö 'ö 'wun giagia 'ka, me 'ö -gludë Davidö -bha -lakele 'dhoë- -gɔ, 'ö =ya 'kwɛɛ ta, 'ö- 'po -mɛ gbe 'yaa 'dhö, 'ö =ya 'kwɛɛ 'po 'ö- ta -mɛ gbe 'yaa 'dhö bhë -ya -pö; ⁸Pë -nu 'ü- kë -na 'töüdhö bhë a- -dɔ. A- =dɔa' -nɛ =faan' 'ö ü -gɔ bhë, -yö 'tee; 'kɛɛ kë- wo 'dhö bhë, ü 'wun -ma n -wo -ta, 'ü to -klu -sü 'ka n -ma; 'ma 'kwɛɛ do 'po ü -gɔ; me gbe 'ka 'dho -mɔa -bha kö -ya 'dhi ta ü -gɔ. ⁹Dü -bha -kpakuëme -nu, =suame -nu 'wo wo -de kë -na Zuifö 'ka, 'kɛɛ kö 'waa Zuifö 'ka bhë, pë 'a dho -a kë -an 'ka 'ö tɔɔ: A -dho -an 'gbee- -ta bho 'wo nu 'wo -lo wo kpɔn 'gü ü 'dhiö ü -bhlë

-ya -sü 'ka. Bhii kö =waa- do -ne ü -dho -yö n -kë. ¹⁰Dhe 'ö -kë -ne ü ü -zo -kë n -wo -nu 'a- nu bhë -an 'piö, =zuö' -kë -saa -sü 'ka bhë, kö ma -de 'pö, a -dho n -zo kë ü 'piö 'yena 'yö 'dhoë- nu 'kpongtaa kö 'kpongtaame -nu -waan bɔ 'güdandhe 'gü bhë -a 'töng 'yö dho kaa bhë -a 'ka. ¹¹A nu -na; pë -nu 'wo ü -gɔ bhë, -bhö ü -zo kë -an 'piö -yö kë 'dhö kö -kun me 'kpaan gbë dho -to -a 'gbee- 'ka 'gɔ =gbllaa' 'ö -ya ü -bha 'ka bhë -a kun ü -gɔ! ¹²Me 'ö 'dhoë- to -a 'gbee- 'ka, a -dhoë kë n -ma -Zlan -bha 'kɔ -gban 'lü 'ö yaa 'dho yö plaan gbɔ -a 'ka; a -dho n -ma -Zlan 'tɔ waa- n -ma -Zlan -bha pödhe 'tɔ -ya -a -bha. Pödhe bhë 'ö tɔɔ Zeluzalemë -dhe -dëü 'yö dho go dhang- 'gü, n -ma -Zlan 'piö. 'Tɔ -dëü 'ö n -ma zlöö -ne a -dho -a -ya -a -bha 'pö.

¹³Kö me 'ö- 'wun ma -to 'dhö -dhö, 'wun 'ö -Zuu 'slööslö 'dhoë- =blee' -na Yesu -wun -dhe 'wun gia- -me -nu -dho 'kuë- -sü -dhë -ne -ya ma!»

**'Sëedhe 'ö dho Yesu -wun -dhe 'wun gia- -me
-nu -dho 'kuë- -sü 'ö Laodise -a 'piö**

¹⁴'Yö- pö: «-Bhö 'sëedhe bɔ 'dhiö -sü -Zlan -bha me -nu 'ka -me 'ö Yesu -wun -dhe 'wun gia- -me -nu -dho 'kuë- -sü 'ö Laodise -a -dhë =ne: Me 'wo- -dhe Amen, 'yö =goo- -to -wo 'gü -sü -zë 'ka, 'yö 'wungiamë 'ka, yö 'ö pë 'ö -Zlan -ya -da 'töüdhö 'yö- -bɔa -ta 'ka, -ya -pö: ¹⁵Pë -nu 'ü- -kë 'töüdhö bhë a- -dɔ. A- =dɔa' =ne 'bhaa -saa 'iin 'bhaa 'siözë. -Yö -dho kë n -dhë -së -be kö pë =ple 'wo bhë 'ü- do 'sü 'ü kaa 'gbönggböng. ¹⁶'Kee 'ö -kë -ne ü 'zɔzɔ, 'ö 'bhaa -saa 'iin 'bhaa 'siö- bhë kö a -dho -pe ü 'ka -ne -kɔ 'ö 'yi 'zɔzɔ 'dhö -pë -da -na -a 'ka me 'ka bhë -a 'dhö. ¹⁷'Ö tɔɔ ü- -pö ü -bhɔɔzë, 'go mü ü -bha 'wun -nu -wo 'dho -na 'dhiö, 'iin pë gbë -wun 'yaa ü kë. 'Kee ü 'yenazë, 'ö 'bhaa- =tei' dɔ. Ü 'feezë, 'ü ü 'kpaan 'ka 'ö ü 'yënnng 'dho tii. ¹⁸=Dhe -kë 'dhö, 'a ü -kpaɔ -na kö 'ü 'sënnng 'ö -ya kë 'slööslö 'siö 'ka bhë 'ü- 'dho n -gɔ kö 'üën- kë -bhɔɔzë giagiawo. -Bhö sɔ 'puu -nu 'dho 'pö 'ü- kë ü -bha kö -yaan ü -bha -to 'kpaan -sü lë- -nu -ta -bin. 'Ü -yö 'yënnng pë 'yi 'dho 'ü- yö ü 'yënnng kö 'üën- -dhe yö. ¹⁹Me -nu 'ö -an -dho -yö n -kë bhë a -an -kun 'gbee- 'a -an =dɔɔ. -Bhö pë -nu kë, -kë -naazë -sü 'ka, 'ü 'kan ü -bha =sɔɔn yaa -nu -bha! ²⁰-Bhö -dhe -ga, a dɔ -sü 'ka 'kɔdhi -bha, 'a 'kwëë -ta -ma -na; =ya kë =ne me =ya n -wo ma =ya 'kwëë 'po n -gɔ, a -dho -da -a -gɔ kɔɔ, 'a pë -bhö -a 'piö, 'ö yö -de 'pö 'ö pë -bhö n 'piö. ²¹Me -nu 'wo 'dhoë- to -a 'gbee- 'ka, a -dho we -a -bha -an -gɔ 'ö 'wo -ya n 'sian 'piö n -ma 'gɔ -gbloo 'gü =ne -kɔ ma -de 'pö 'a toë 'gbee- 'ka, 'ö 'a -ya -sü 'ka -a 'ka n Dë 'sian 'piö, -a -bha 'gɔ -gbloo 'gü bhë -a 'dhö.

²²Kö me 'ö- 'wun ma -to 'dhö -dhö, pë ö -Zuu 'slööslö 'dhoë- =blee' -na Yesu -wun -dhe 'wun gia- -me -nu -dho 'kuë- -sü -dhë -ne, -ya ma!»

Me 'ö -ya -sü 'ka 'gɔ -gbloo 'gü bhë -a gba -kɔ 'ö dhang- 'gü

4 ¹=Dhe 'ö -ya 'go mü a 'yanpiöpë do 'bhaa -yö. 'A 'kwëë do yö, kö -yö 'po -sü 'ka dhang- 'gü; 'ö -wo do 'a- ma 'dhiö 'ö- -drinnng -yö -kë =ne

'truu -wo 'dhö bhë, 'a- ma 'zü 'ö- pö n -dhë: «-Bhö -da 'ü nu zö kö pë -nu 'wo dho kë 'dhiö =zian' 'aan- -zɔn ü -dhë!»² 'Ö to mü 'ö -Zuu 'slööslö -yö pa n 'ka. 'Ö -dhe 'a- -ga kö 'gɔ -gbloo do -yö dɔ -sü 'ka dhang- 'gü mü. Me do -yö -kë -ya -sü 'ka 'gɔ -gbloo bhë -a 'gü; ³'ö- wöödhe 'bhü -yö -kë -ne -guö -wungbeezë -suu'- 'wo- -dhe 'zasüpë 'ö- bun 'yan dho -gbleibizë 'iin -guö -wungbeezë -suu'- do 'wo- -dhe 'saaduanö 'ö- bun dho nuæzë -an 'dhö. Dha -bhüö 'ö- 'yan 'dho 'bhü -sü 'ka -ne -guö -wungbeezë -suu'- gbe 'wo- -dhe emelodö 'ö- bun -yö -kë -gbleibizë bhë -a 'dhö, -yö -nië -a -bha 'gɔ -gbloo -zü. ⁴'Piö -bhɔ =taa' -sü -zë 'ka -a -zü 'to, 'gɔ -gbloo 'gɔɔ- =plë ö ga -yiisië 'bhaa gbe -wo -kë mü. 'Ö me ziizii 'gɔɔ- =plë ö ga -yiisië 'ö sɔ 'puu 'dhö -an -bha, 'go mü 'ö 'sënnɔ =gblaa' 'dho -ya -sü 'ka -an -gɔ -bha -wo -kë -ya -sü 'ka -an 'gü. ⁵'Ö pë -nu 'wo -kë -ne dha -bha 'yan bɔ -sü 'dhö -wo bɔ 'gɔ -gbloo =vaazë 'gü 'ma =zian' 'wo -ziö -blaandhö, 'ö pë -nu 'wo -kë -ne dha -bha 'we -sü 'dhö 'wo bɔ -dhe do bhë -a 'gü =zian' 'wo -we. 'Ö -zuö -nu -wo bɔ 'ma =zian' 'pö 'wo -we. 'Gbia -be 'slaple -wo -kë 'kun =dhia 'gɔ -gbloo bhë -a 'dhiö mü. 'Gbia -be 'slaple 'wo bhë 'wo tɔɔ -Zlan -bha -Zuu 'slaple. ⁶'Gɔ -gbloo 'dhiö mü, pë 'ö -kë -ne pë 'wo- 'vedhe kë -na -a 'ka -a 'dhö bhë, -a 'yipuë -yö -kë mü, bhii me 'yan- -bɔ -a 'gü -ne 'yi 'slööslö 'dhö.

'Gɔ -gbloo ziën waa- -a 'sian 'piö -dhe -nu -bha, pë 'bhee- -yiisië 'ö -an 'yan -nu 'dho -mɔ -sü 'ka -an buën- -an 'dhiö =zian' waa- -an =zlöö =zian' -wo -kë mü. ⁷Pë 'bhee- -nu 'wo bhë -a -bleezë -yö -bhɔ =laa' -bha; -a =plë -naa -yö bhɔ -du 'në -bha; a- kë -yaaga -naa wöödhe -yö bhɔ me 'bhee- -lü wöödhe -bha, 'ö- kë -yiisië -yö bhɔ 'gblübbhaa 'ö -lö =dhia -a -bha. ⁸Pë 'bhee- -nu -yiisië 'wo bhë, -a me 'ö -dhö -a gban -yö 'slado; 'ö -an 'yan -nu 'dhö -lo -sü 'ka -an gban -ta dhuö -dhe -nu waa- -an gban -löö -dhe -nu -bha. 'Ö 'waa wo bo -a pö -sü 'ka -dhe 'po -sü waa- 'bin 'më -sü -an 'gü -nɛɛ: «'Slööslö, 'slööslö, 'slööslö 'yö tɔɔ Dëme -Zlan 'piigbeezë 'yö -kë -dhö, 'yö -dhö, 'yö nu -na.» ⁹'Ö =ya kë pë 'bhee- -nu -yiisië 'wo bhë -wo 'tan -nu bho -na kö me 'ö -ya -sü 'ka 'gɔ -gbloo 'gü, 'yö -dhö =toëpö 'ka bhë -waan 'tɔ kë =va, -waan -a =bhlë -ya, 'go mü -waan zuö pö, ¹⁰'Ö me ziizii 'gɔɔ- =plë ö ga -yiisië 'wo bhë 'wo -lo wo kpɔn 'gü, me 'ö -ya -sü 'ka 'gɔ -gbloo 'gü 'ö -dhö =toëpö 'ka bhë -a wö 'dhiö 'ö 'wo- gba. 'Wo dho wo -bha 'gɔ =gblaa' 'ka 'wo- -lo 'gɔ -gbloo 'dhiö -a pö -sü 'ka -nɛɛ: ¹¹«'Yi Dëme, yi -bha -Zlan, -yö ü -ma -kun kö 'tɔbhɔdhe, =bhlëyadhe waa- 'piigbeedhe -wo kë ü -bha 'ka; bhii bhi -ne 'ü pë 'plë -da, 'ö -dhi ü -dhë 'ü -këdhösü nu -an -dhë.»

'Sëédhe -be 'dhipome

5 ¹A 'sëédhe -be 'ö -kë -ne pë -dho 'kou -sü -zë 'dhö -a -yö me 'ö -kë -ya -sü 'ka 'gɔ -gbloo 'gü bhë -a =kwɛɛ- 'gü -kɔ 'gü mü. Pë -yö -kë -ya -sü 'ka -a 'gü -dhe waa- -a 'pian =zian' -dhe -bha, 'yö 'sëédhe -be 'dhi ta -sü -zë 'ö =duakëpë 'slaple 'dhö -a -ta ('ö me do dho -a 'dhi po) -a 'ka. ²'A -Zlan -bha bɔme do 'piigbeezë 'yö 'wun =blɛɛ' -na 'gbee- 'ka -a yö kö -ya pö -na: «Dö

'yö- -ma kun kö -yö =duakëpë -nu 'wo =ne -an =wüüi- kö -yaan 'sëédhe -be 'ö =ne -a 'dhi 'po e?» ³ Kεε -a -mε gbe 'yaa -dhö, dhang- 'gü, 'kpongtaadhe, 'iin 'se =löö kö -yaan 'sëédhe -be bhë -a 'dhi 'po -yaan =kpɔɔ- -a 'gü. ⁴ A 'gbo -bɔ =va 'ka 'ö tɔɔ mε gbe yaa kë -dhö kö -yaan 'sëédhe -be bhë -a 'dhi 'po -yaan -dhe -ga -a 'gü. ⁵ =Dhe -ya kë 'dhö, 'ö mε ziizii -nu 'wo bhë 'ö- mε do -ya pö n -dhë: «Kö -kun 'ü 'gbo bɔ! -Bhö -dhe -ga: =Laa' 'ö Zuda -gɔ 'gunng 'gü, 'ö -gludë Davidö =suutame 'ka, yö =ne 'ö 'to -a 'gbee- 'ka. Yö =ne 'ö -mɔa kö -yö =duakëpë 'slaple bhë -an =wüüi- kö -yaan 'sëédhe -be 'ö =ne -a 'dhi 'po.»

⁶ =Dhe 'ö go mü, 'a 'bhlanë -gbɔng do yö kö -yö -dɔ -gɛn -ta -sü 'ka 'gɔ -gbloo 'dhiö pë 'bhee- -nu -yiisië waa- mε ziizii -nu 'wo bhë -an ziën. 'Bhlanë bhë -yö -bhɔ pë 'wo- zë -a -bha. -A -sö -nu -wo 'slaple, 'ö- 'yan -nu 'dhö 'slaple; wo =ne 'wo tɔɔ -Zlan -bha -Zuu ('slöösLö) 'slaple 'ö -an bɔ 'se -dhe 'saadhö -a 'gü sia- bhë. ⁷ Yö 'bhlanë bhë 'yö -yɔɔn 'sëédhe -be bhë -a -bha, 'yö- sü mε 'yö -ya -sü 'ka 'gɔ -gbloo 'gü bhë -a -kwεε- 'gü -kɔ 'gü. ⁸ =Dhe 'ö -ya 'sëédhe -be 'ö bhë -a 'sü, 'ö pë 'bhee- -nu -yiisië waa- mε ziizii -nu 'gɔɔ =ple ö ga -yiisië 'wo bhë 'ö -an 'ple -wo -lo wo kpɔn 'gü 'bhlanë bhë -a 'dhiö. Mε 'ö -dhö kong do, waa- 'sënng -kɔɔ -nu 'ö pë 'tëë -sëëzë 'ö -ya kë 'wo- -güö 'ö- pa -wo kë -an -gɔ. Pë 'tëë -sëëzë 'ö bhë 'ö tɔɔ =bhea' -wo 'ö -Zlan -bha mε -nu -dho 'kuë- -sü -wa wo. ⁹ 'Wo 'tan -dëü bho =woë' =ne: «-Yö ü -ma -kun kö 'üën- 'sëédhe -be 'ö =ne -a 'sü, 'üën- =duakëpë -nu 'wo bhë -an 'wü. Bhii -wo ü -zë, 'ö 'ü bɔ -a -ta 'ü mε -nu 'wo go 'gunng 'saadhö, -wo =suu- 'saadhö, 'se 'saadhö waa- ö 'gü -mε -nu -an -gɔ -ta dhɔ kö -waan kë -Zlan -bha 'ka. ¹⁰ 'Bha -an kë 'sɛgɔ do 'gü -mε -nu 'wo slabhome 'ka -an 'ka -waan yuö kë kwa -bha -Zlan -dhë; -wo -dho -gludëdhe kë 'kpongtaa.»

¹¹ A ko 'zü 'a -dhe -ga; 'a -Zlan -bha bɔme -nu 'ö 'wo -kë -ne mε -vuu -plëëzë -gwaa -vuu -plëëzë 'dhö -an yö kö -wo mü. A -an -yö kö -wo =nië' -sü 'ka 'gɔ -gbloo, pë 'bhee- -nu waa- mε ziizii -nu 'wo bhë -an -zü 'to. ¹² -Wo -kë 'tan -nu bho -dhia 'wo- pö -wo 'gbee- 'ka =neε: «'Bhlanë 'wo- zë bhë -ya -ma -kun kö -yaan 'piigbeedhe 'dhö, =bhɔɔpë -nu, -kë 'kpaakpasü -nu waa- 'gügbeedhe -nu, =bhlëyasü -nu, 'tɔbhɔdhe -nu waa- 'tɔblüsü -nu -waan kë -a -bha 'ka.»

¹³ 'Go mü 'zü a pë -nu 'ö -Zlan -yö -an -da, 'wo dhang- 'gü, 'wo 'kpongtaa, 'wo 'se =löö, 'wo 'yoo =bhaa, pë -nu 'saadhö 'ö -Zlan -yö -an -da 'wo -dhe 'saadhö -a 'gü, -an -wo -ma kö -wo 'tan bho -na =woë' =neε: «Mε 'ö -ya -sü 'ka 'gɔ -gbloo 'gü waa- 'bhlanë, 'tɔsaablüdhe, =bhlëyadhe, 'tɔbhɔdhe waa- 'piigbeedhe -wo kë -an -bha 'ka =toëpö 'ka.»

¹⁴ 'Ö pë 'bhee- -yiisië 'wo bhë 'wo- pö: «Amen.» 'Ö mε ziizii -nu 'wo bhë 'wo -lo wo kpɔn 'gü, ('yö 'bhlanë waa- mε 'ö -kë -ya -sü 'ka 'gɔ -gbloo 'gü bhë,) 'wo -an gba.

=Duakëpë -nu

6 ¹ 'Go mü 'zü 'a 'bhlanë bhë 'a- yö kö =duakëpë 'slaple bhë =yaa- do 'wü; 'ö pë 'bhee- -nu -yiisië 'wo bhë 'a- do -wo ma kö -ya pö -na -wo 'gbee-

'ka =ne dha -bha 'gbla -wo 'dhö -næ: «-Bhö nu!» ²=Dhe 'a- -ga bhë 'a =soo 'puu do yö. Me 'ö -kë -a =taa bhë 'sɔɔn do -yö -kë -a -gɔ; 'ö 'wo 'gɔ =gblaa' do nu -a -dhë. Yö 'ö -to -a 'gbee- 'ka -me 'ka bhë, 'yö dho -yaan 'to -a 'gbee- 'ka zü.

³Ö 'bhlanë -yö =duakëpë kë =plë -naa wü; 'a pë 'bhee- -nu 'wo bhë -a kë =plë -naa -wo ma kö -ya pö -na: «-Bhö nu!» ⁴=Dhe =ya kë 'pö 'ö =soo do 'ö- bun 'dhö nuæzë bhë 'yö -wo, 'ö me 'ö -kë -a =taa bhë, 'ö -kɔ -mɔ 'wuën- -sü -yö nu -a -dhë kö -yaan -glu -da 'kpongtaa, -yö kë 'dhö me -nu -waan wo 'ko -nu zë. 'Wo -dhaa do =va nu -a -dhë.

⁵Ö 'bhlanë -yö =duakëpë kë -yaaga -naa wü; 'ö 'a pë 'bhee- -nu bhë -a kë -yaaga -naa -wo ma kö -ya pö -na: «-Bhö nu!» Ö -dhe 'a- -ga, 'a =soo tii do yö. Me 'ö -kë -a =taa bhë 'kilong kpö do -yö -kë -a kwæ. ⁶Ö 'a 'we -wo do 'yö go pë 'bhee- -nu -yiisië 'wo bhë -an ziën -a ma =næ: «-Bluu'- waa- 'klën -an -bi -wun -dho kë 'gbee- =Bluu'- -bi 'kilong do =sɔɔng' -yö -dho kë -gen dɔ do =saan' 'ka; kö 'klën -bi 'kilong -yaaga =sɔɔng' -yö kë -gen dɔ do =saan' 'ka 'pö. 'Kæ kö -kun 'ka pa 'yɔn waa- -drɔɔn -an 'ka!»

⁷=Dhe 'ö 'bhlanë -yö =duakëpë -yiisië -naa wü, 'ö pë 'bhee- -nu bhë -a -yiisië -naa -de 'pö 'a- -wo ma =næ: «-Bhö nu!» ⁸=Dhe 'a- -ga bhë 'a =soo bun 'yuënyuënzë do yö. Me 'ö -kë -a =taa bhë -a 'tɔ tɔ ga, 'ö =glööbɔɔ -yö zïö -a 'piö. 'Wo 'kpongtaame -nu 'gbu -bha 'gbu nu -a -dhë kö -yaan pë yaa kë -an 'ka -dhaa, din -nu, 'yua -nu waa- wü 'dhiözë 'gügbeezë -nu -an -kwaa'.

⁹Ö 'bhlanë -yö =duakëpë 'sɔɔdhu -naa wü. Ö me -nu 'wo -an zë wo -bha -Zlan -wo -dhe 'wun gia- -sü waa- -a -wo =ble' -sü -wun 'gü bhë, 'a -an nii yö -Zlan -bha sla- -bho -a -ta -pë =löö. ¹⁰-Wo -kë 'gbla -sü 'gü =woë' -næ: «Yi Dëme, bhi 'ü 'slööslö, 'ü -dhö 'wun giagia 'ka, ü -dho 'kpongtaame -nu -bha za kan, 'go mü kö 'üën- me -nu 'wo 'wun -wɔ yi -ta, 'yi to -a -kwaa' =ne -an 'klo- bhɔ -më yië =e?» ¹¹Ö me 'ö -dhö 'wo gblang 'puu do nu -a -dhë, 'go mü 'wo- pö -an -dhë -wo wo =fuë =kun 'töng 'ö bhë -a 'ka, -yö 'dho -yö yöë -an dhegluzë -nu waa- -an 'bhame -nu 'wo yuö do bhë -a 'gü 'wo dho -an zë =ne -kɔ 'wo -an zaa -a 'dhö bhë -an -dho 'kuë- -sü 'dhiö -mɔ 'kuë =yië'.

¹²=Dhe 'a- -ga kö 'bhlanë -yö =duakëpë kë 'slado -naa 'wü -na. Ö 'sezluundhe 'gbee- -yö -kë, 'ö lan- -yö -kë tii =ne sɔ tii ga =vaazë do 'dhö. Ö 'su -de 'pö 'yö -kë nuæzë =ne fei 'dhö. ¹³Ö 'susongga -nu -wo go dhang- -bha 'wo -püö 'se -ta =ne -kɔ 'ö figö bhe 'ö =tun -kpo 'ö 'tëë 'gbee- =ya -ma -a -bha 'yö =zaan 'zan -na 'ö -püö -na -a 'ka bhë -a 'dhö. ¹⁴Ö dhang- -yö =yɔɔn ö =bhaa =ne -kɔ 'wo 'sëédhe -be kë -na -a 'ka (=ne -kɔ 'wo =sɛ' -be kë -na -a 'ka bhë) -a 'dhö. Ö -tɔn -nu 'saadhö waa- 'se -tɔn -nu 'wo 'yi ziën -an 'plë -wo go wo pin =taa. ¹⁵-Gludë -nu 'wo 'kpongtaa -nu, 'dhiö -sü me 'ka -me -nu, 'dhasi =kɔɔnmë -nu, =bhɔɔmë -nu, 'piigbeedhe -nu, me -nu 'wo to -nu, me -nu 'wo 'gan 'gü 'iin 'waa 'gan 'gü -nu, -wo -dho -bin =duudhe -nu waa-

-guö -tɔn 'gü -dhe -nu -an -bha. ¹⁶'Ö 'wo- pö -guö kpö -nu 'iin -tɔn -nu -dhë: «Ka -lo yi -ta me 'ö -ya -sü 'ka 'gɔ -gbloo 'gü bhë waa- 'bhlanë -an -bha -naazuédhe -gɔ. ¹⁷Bhii -an -bha 'wun -naa -an -zuë -yi 'ö yi -va 'ka bhë -ya -lo; dö 'yö dho dha -an -gɔ -ɛ?»

Izlaelö 'segɔ -gbaan 144.000

7 ¹Dhe -ya kè 'dhö, a -Zlan -bha bɔme -nu -yiisië -yö 'se 'pian -yiisië -bha. 'Yö 'tëë -nu -yiisië 'wo -piö -na 'kpongtaa bhë, 'wo -an kun -yö kè 'dhö kö -kun 'ö 'tëë dho -ma 'se -ta -dhe, 'yoo -bhaa -dhe, 'lü tuö -dhe -nu 'iin -dhe 'saadhö -a gbe 'gü. ²A -Zlan -bha bɔme do yö kö -yö -da -na dhang- 'gü lan- 'go =zian' kö -Zlan 'bhee- -bha -duakëpë -ya -gɔ. 'Ö -gbla -wo 'gbee- 'ka -Zlan -bha bɔme -nu -yiisië 'ö -kɔ -mɔ 'wuën- -sü 'dhö -an -gɔ bhë -an -dhë kö -waan 'wun yaa kè 'se waa- 'yoo -an 'ka bhë -an -dhë =ne: ³«Kö -kun 'ka 'wun yaa -kè 'se 'dhö, 'yoo 'dhö 'iin 'lü -nu -an gbe 'ka, -yö 'dho -yö yöë yi -bha kwa -bha -Zlan -bha yuökëme -nu -bha =dua' kè -sü -bha!» ⁴'Ö 'wo me -nu 'ö -Zlan -bha =duakëpë 'dho -ya -sü 'ka -an -kpong 'gü bhë 'wo -an -dho 'kuë- -sü 'tɔ pö n -dhë: -An -dho 'kuë- -sü -yö -kè -vuu -këng' do waa- me -lü -vuu 'gɔɔ- -yiisië ö ga -yiisië (144.000) 'wo go Izlaelö 'gunng 'saadhö -a 'gü. ⁵Me -lü -vuu 'gɔɔ- do ö ga =ple 'wo go Zuda -gɔ 'gunng 'gü 'ö =duakëpë -yö -ya -an -bha; Luben -bha -vuu 'gɔɔ- do ö ga =ple, Gadö -bha -vuu 'gɔɔ- do ö ga =ple, ⁶Asee -bha -vuu 'gɔɔ- do ö ga =ple, Nefötali -bha -vuu 'gɔɔ- do ö ga =ple, Manase -bha -vuu 'gɔɔ- do ö ga =ple, ⁷Simeɔn -bha -vuu 'gɔɔ- do ö ga =ple, Levi -bha -vuu 'gɔɔ- do ö ga =ple, Isakaa -bha -vuu 'gɔɔ- do ö ga =ple, ⁸Zabilɔn -bha -vuu 'gɔɔ- do ö ga =ple, Zozefu -bha -vuu 'gɔɔ- do ö ga =ple, 'ö Benzame -bha -yö kè -vuu 'gɔɔ- do ö ga =ple.

Me gbung -va

⁹Dhe 'ö -ya kè 'dhö, a -dhe -ga 'zü 'a me gbung -va yö: 'Ö me gbe yaa kè -dhö kö me -nu 'wo -kè wo 'ko =bhaa mü -yaan -an -dhong'-. -Wo -kè me -nu 'wo go 'se 'saadhö, 'gunng 'saadhö, 'següme -nu 'saadhö waa- wo -suu' -ta 'saadhö -a pö -me -nu 'ka. -Wo -kè dɔ -sü 'ka 'gɔ -gbloo waa- 'bhlanë -an 'dhiö; gblang 'puu -yö -kè -an -bha, 'ö -glaa- -paa -nu -wo -kè -an kwɛɛ. ¹⁰-Wo -kè 'gbla -sü 'gü 'gbee- =woë' -ne: «Kwa -bha dha -sü -yö -go kwa -bha -Zlan 'yö -ya -sü 'ka 'gɔ -gbloo 'gü waa- 'bhlanë -an kwɛɛ!» ¹¹-Zlan -bha bɔme -nu 'saadhö -wo -kè 'gɔ -gbloo bhë, me ziizii -nu waa- pë 'bhee- -nu -yiisië 'wo bhë -an -zü 'to 'wo -lo 'gɔ -gbloo 'dhiö mü -gɔ -gblü 'sei -sü 'ka 'ö 'wo -Zlan gba ¹²-a pö -sü 'ka =neɛ: «Amen! 'Tɔsaablüdhe, 'tɔbhɔdhe, 'kpaakpadhe, =seɛbhodhe, mesüvasü, 'piigbeedhe waa- 'gügbeedhe -wo kwa -bha -Zlan -bha 'ka =toëpö 'ka! Amen.»

¹³'Ö me ziizii -nu 'wo bhë 'ö- me do -yö n -dhee' kpɔ =neɛ: «Dö -nu 'ö gblang 'puu -nu 'dho -an -bha =neɛ, 'go mü -wo -go më -ɛ?» ¹⁴A- -daa -kè

-a -gɔ -nɛɛ: «Ma -zè 'maa- dɔ -ɔ, n Dème; bhi -nɛ 'ü dho -mɔa -bha kö 'üen-dɔ.» -Dhe -ya kë 'dhö, 'yö- pö n -dhè: Mɛ -nu 'wo bɔ 'klobhɔdhe -va kwɛɛ wo -mü. -Wo wo -bha gblang -zlu -a -kè 'slööslö -sü 'ka 'bhlanè fei 'ka. ¹⁵Pè 'ö -kè 'ö 'wo dɔ -Zlan -bha 'gɔ -gbloo 'dhiö, yuö -kè -Zlan -dhè -sü 'ka gbgeng waa- lènnɔ -a -gɔ kɔɔ 'ö bhè, 'ö mɛ 'ö -ya -sü 'ka 'gɔ -gbloo 'gü 'ö dho 'ö -zo kë -an 'piö. ¹⁶Din -nu, 'yi mü -dho -nu, -an gbɛ 'ka 'dho -an kë gbɔ; 'iin lan- -nu, 'siö 'gbee- -bha -dɔ mɛ -ta -sü -nu gbɛ 'ka 'dho -an kë gbɔ. ¹⁷Bhii 'bhlanè 'yö 'gɔ -gbloo zièn bhè -yö -dho kë -an -maakème 'ka, 'yö dho -an 'ka -kè -a 'gü -yi 'tɔɔ -bhaa. 'Go mü -Zlan -dho -an 'yènnɔ 'plɛ -dhuè'.

-Duakèpè 'slaple -naa

8 ¹-Dhe 'ö 'bhlanè -yö -duakèpè kë 'slaple -naa wü, -dhe -yö ga diindhö dhang- 'gü 'yö -mɔ 'lele 'gbu -bha. ²'Ö 'a -Zlan -bha bɔmɛ -nu 'slaple yö, kö -wo dɔ -sü 'ka -Zlan 'dhiö; 'wo 'truu 'slaple nu -an -dhè.

³'ö -Zlan -bha bɔmɛ do -yö nu 'yö dɔ -Zlan -bha slabhodhe 'sɔɔ. 'Güö -pè 'tèè -sèèzè -yö -a 'gü -pè 'ö 'sènnɔ 'ka bhè -yö -kè -a kwɛɛ, 'ö 'wo 'güö -pè 'tèè -sèèzè bhè 'wo- nu -a -dhè -va kö -yaan kpa -Zlan -bha 'sɛgɔgüme -nu 'slööslö -bha -bhea' -wo -bha -yaan sla- bhoè slabhodhe 'ö 'sènnɔ 'ka, 'gɔ -gbloo 'dhiö bhè -a -ta. ⁴Pè 'tèè -sèèzè bhè, -a 'güö -sü 'ka, -a 'sion waa- -Zlan -bha mɛ -nu 'ö -an sü 'ö -bha 'ka -an -bha -bhea' -wo -wo -luu 'kuè -Zlan -bha bɔmɛ bhè -a kwɛɛ -Zlan wö 'dhiö mü. ⁵-Dhe -ya kë 'dhö, 'ö -Zlan -bha bɔmɛ -yö pè 'tèè -sèèzè -yö -a 'gü -pè 'ö bhè, 'yö- pa 'siö 'ö slabhodhe -bha mü bhè -a 'ka; 'yö- -zuö sia-. 'Ö dha -nu -wo -we; 'we -wo -nu, pè -bha 'yan bɔ -sü -nu waa- 'se -bha -zluun -sü -nu -wo -kè.

⁶'Ö -Zlan -bha bɔmɛ 'slaple 'ö 'truu 'slaple 'dho -an kwɛɛ bhè 'wo yö wo -baa' -sü -bha kö -waan 'truu -piö.

⁷'Ö -Zlan -bha bɔmɛ -bleezè -yö 'truu -piö. 'Ö mængga -nu waa- 'siö 'ö fei -yö -kaan -a 'ka, -wo -lo 'kpongtaa. 'Ö siadhe 'bhaa -nu, 'lü 'bhaa -nu 'wo -güö -dhe -nu 'gü, -dhe -nu 'gü 'kpongtaa 'wo dho -mɔ -a 'fa bho 'gü -yaaga 'pian do -bha. 'Ö -blèè' -nu 'wo -güö 'töüdhö.

⁸'Ö -Zlan -bha bɔmɛ kë -plɛ -naa -yö 'ö -bha 'truu -piö. 'Ö pè 'ö -kè -nɛ -tɔn -suu- do -va 'ö 'siö 'dhö -a -bha, 'yö -zuö 'yoo -bhaa, 'ö 'yoo 'pian do 'ö -mɔ -a 'fa bho 'gü -yaaga -bha -yö -gla fei 'gü. ⁹'Ö 'tè -pè 'saadhö 'wo 'yoo 'pian 'ö bhè -a -bhaa, 'ö 'wo ga; 'ö 'yi -ta -gɔ -nu 'wo -dhe bhè -a 'gü 'wo -siö.

¹⁰'Ö -Zlan -bha bɔmɛ kë -yaaga -naa -yö 'truu -piö. 'Ö 'susongga do -va 'ö -kè 'güö -dhia -nɛ 'gbia -dɔɔ 'dhö -yö -go dhang- 'gü 'yö -piü 'yiga -vava -nu waa- 'yigɔbhɔdhe -nu 'wo 'kpongtaa -an -bhaa -dhe -nu 'gü, 'ö -an -dho 'kuè- -sü -yö -mɔ -an 'fa bho 'gü -yaaga 'pian do -bha -dhe -nu -bha. ¹¹'Susongga 'ö bhè -a 'tɔ tɔ «Pè 'güüzè». 'Ö -wun 'gü, 'ö 'yi -dhe 'pian -nu 'wo 'dhö bhè 'wo -kè 'güüzè; 'kpongtaame -nu -dhe -va -dhe -wa mü; 'yö 'wo ga.

¹²Ö -Zlan -bha bɔmɛ kɛ -yiisiɛ -naa -yö 'truu -piö. Ö lan- -bha 'bhü -sü -yö -kan 'pian 'fa bho 'gü -yaaga -bha; pɛ do bhè 'ö -kaa' 'su waa- 'susongga -nu -an -gɔ 'pö. Ö -dhepuudhe yaa kɛ -dhö -dhe 'po yi 'gü -glu 'gü dhe -yaaga kpö do 'ka, 'ö 'töng mɛ 'ö bhè 'ö to -dhetiidhe 'ö trö 'sënsëndhö -a 'gü. -Kɔ do bhè 'ö -kaa' gbeng -bha 'ka; 'ö gbeng 'gü -glu 'gü dhe -yaaga 'ka 'ö 'susongga -nu waa bhüɛ.

¹³Yö -dhe 'a- -ga 'zü, 'a 'gblübbhaa do yö kö -yö -niè' -na dhuö -gbiin. -Yö -kè -a pö -dhia -woè' 'gbee- 'ka -nɛ: «-Mè 'yena -wun oo, -mè 'yena -wun oo, -mè 'yena -wun 'ö dho kɛ mɛ -nu 'wo 'kpongtaa -an 'ka, yi 'ö -Zlan -bha bɔmɛ -nu -yaaga 'wo to -nɛ 'wo dho 'truu -piö -a 'ka -a 'ka 'dhö -oo!»

9 ¹Ö -Zlan -bha bɔmɛ kɛ 'sɔɔdhu -naa -yö 'truu -piö. Ö 'susongga do -yö go dhang- 'gü, 'yö -püö sia-; 'a- yö; 'wo -glu 'kpa 'dhi -va -yö -a 'dhiö -pè -lakele nu -a -dhè. ²Ö 'susongga 'ö bhè 'ö -glu 'kpa 'dhi -va bhè -a 'dhi -po, 'ö 'sion -va 'ö -kè -nɛ 'sion 'ö 'go -na -bluu- -kè -a 'gü -kɔ 'gü bhè -a 'dhö 'ö -lloo 'ö lan- waa- plaan 'puu 'piö -dhe -wo -trö 'sion 'yö go -glu 'kpa 'dhi -va 'dhi 'gü bhè -a -kwaa'. ³Ö 'peedhekpaa -nu -wo go 'sion 'ö bhè -a 'gü 'wo -pen 'kpongtaa sia- -dhe -nu -bha; 'ö -kɔ -mɔ 'wuën- -sü -yö nu -an -dhè kö -waan mɛ -nu 'kun -nɛ gian -nu 'dhö. ⁴Wo- pö -an -dhè kö -kun 'wo 'wun yaa gbe -kè -blèè' -nu, 'lü -nu waa- tapè -nu -an gbe 'ka; 'kɛɛ mɛ -nu 'ö -Zlan -bha -duakèpè 'yaa -an -kpong -bha -nɛ 'wo dho 'wun yaa kɛ -an 'ka. ⁵-Kɔ -mɔ 'wuën- -sü yaa nu 'peedhekpaa -nu -dhè kö -waan mɛ -nu zè, 'kɛɛ kö -waan mɛ -nu 'yënnng bho -zian' 'su 'sɔɔdhu 'piö. 'Yënnghɔdhe 'ö 'dhoè- nu -an -ta bhè, -yö -dho kɛ -nɛ gian -bha mɛ 'kun -sü 'dhö. ⁶Su 'sɔɔdhu 'töng 'ö bhè -a 'ka, mɛ -nu -wo -dho ga -mɛɛ', 'kɛɛ wo 'ka 'dho -a wo; -wo -dho -a -dho kaa kö 'wo ga, 'kɛɛ ga -yö -dho -duèè -an -dhè.

⁷Peedhekpaa -nu 'wo bhè -wo -bho -soo -nu 'ö -wa -mɔ -glu gɔn -sü -bha -an -bha. Pè 'ö -kè -nɛ 'sënnng 'gɔ -gblaa' -nu 'dhö -wo -kè -an tuö; -an wöödhɛ -yö -bho mɛ 'bhee- wöödhɛ -bha. ⁸-An -bha wun -nu -wo -kè -nɛ dhoo -nu -bha wun 'dhö, 'ö -an 'sɔn -nu -wo -kè -nɛ -laa' 'sɔn 'dhö. ⁹-An -kënnngtadhe -yö -kè -nɛ -gluè 'dhaa- -piö -ta -dhe 'dhö; -an gban -drinng -yö -kè -nɛ -yaagüpè -nu 'wo- -klu -na -soo -nu -bha, 'ö -soo -nu 'dho -an 'gan -na 'wo 'dho -na -glu 'piö bhè -an ziö -drinng 'dhö. ¹⁰-An weng -yö -dhö -nɛ -kɔ 'ö gian -nu -bha 'dhö -a 'ka bhè -a 'dhö, 'ö 'wo mɛ kun -a 'ka. -An weng -nu 'wo bhè -nɛ 'wo pè yaa -kaa' mɛ -nu 'ka 'su 'sɔɔdhu 'piö. ¹¹Ö -an -gɔ 'dhiö, -gludè do 'ö -kè bɔmɛ 'ö go -glu 'kpa 'dhi -va 'gü -a 'ka, -yö yö -an -dhè 'dhiö. -A 'tɔ tɔɔ Eblö -wo 'gü Abadɔn, 'ö Glèkö -nu -wa -dhe Apolion, (-a -gen 'ö tɔɔ «Pëgüsiömɛ»).

¹²Yena -wun -blèezè -ya ziö, -ya 'go mü 'yena -wun -plɛ 'bhaa -wo -dho nu.

¹³Ö -Zlan -bha bɔmɛ kɛ 'slado -naa -yö 'truu -piö. 'A 'we -wo do ma; -yö -go slabhodhe 'ö 'sënnng 'dhö 'mè -sü 'ka -a -bha 'ö -Zlan 'dhiö -dhe

-bha bhë -a 'sian -nu 'piö. ¹⁴'We -wo 'ö 'dhö bhë, -ya -pö -Zlan -bha bome kë 'slado -naa 'ö 'truu -yö -kë -a kwæ bhë -a -dhë: «-Bhö bome -nu -yiisië 'wo -yɔɔ' 'gü 'yiga =va 'wo- -dhe öflatö bhë -a 'sɔɔ bhë -an bho =yɔɔ' 'gü.» ¹⁵'Wo dho 'ö bome -nu -yiisië 'wo bhë 'wo -an bho =yɔɔ' 'gü. -Wo -kë =baa' -sü 'ka 'gbönggböng -kwe 'ö 'dhö bhë, 'su 'ö 'dhö bhë, 'yi 'ö bhë -a 'ka, 'töng gia- bhë -a 'ka -yö kë 'dhö kö me -nu 'wo 'kpongtaa zö, -waan -a 'gügludhe -yaaga kpö -ta do zë. ¹⁶'Ö 'dhasi waa- =soo -nu -dho 'kuë- -sü bhë 'wo- =zɔɔ n -dhë. -An -dho 'kuë- -sü tɔɔ -vuu 'gü -vuu =këng' =ple. ¹⁷'Yanpiöpë bhë -a 'gü, -kɔ 'a =soo -nu waa- wo -yaataame -nu -an yöë bhë 'ö =ne: -Glu gɔɔ -piö 'bhei 'në nueazë 'ö -kë =ne 'siö 'dhö, 'yö 'budhazë =ne -guö -wungbeezë 'wo- -dhe safii -a bun 'dhö, 'ö zënzënzë =ne pë 'tëë yaazë 'ö -kë blɔɔɔ 'ka 'wo- -dhe blɔɔɔ bhë -a 'yan 'dhö -yö -kë -an -bha. =Soo -nu -gɔ -yö -kë =ne =laa' -nu -gɔ 'dhö. 'Ö 'siö -nu, 'siö 'tëë -nu, pë 'piɔɔpiɔɔ 'ö -kë =ne blɔɔɔ 'tëë yaazë 'dhö -wo go -an dhiö. ¹⁸'Ö me -nu 'wo 'kpongtaa bhë 'ö -an 'gü -glu 'gü dhe -yaaga 'pian do -wo ga pë -yaaga 'wo -kë 'siö 'dhö, 'siö 'tëë waa- blɔɔɔ 'tëë yaazë 'ö 'wo 'go -na =soo -nu bhë -an dhiö bhë -an =kwaal'. ¹⁹Bhii =soo -nu -bha -kɔ -mɔ 'wuën- -sü -yö -go -an dhiö -dhe, waa- -an weng -an 'gü. -An weng -nu -wo -bhɔ =mæ -bha, 'ö -an -gɔ 'dhö -an 'dhiö; -an weng -nu -gɔ bhë =ne 'ö 'wo 'wun yaa =kaa' me -nu 'ka.

²⁰Me 'bhee- -nu me 'wo to, me -nu me 'ö waa ga pë -nu 'wo =ne -an =kwaal' bhë, waa 'dho go wo -de këpë yaa -nu -zü. Waa 'dho wo =kwaal' -zuu yaa -nu gba -sü waa- 'sënnng gbapë nu, 'wëü- gbapë -nu, zën gbapë -nu, -guö gbapë waa- 'lü gbapë -nu, 'ö waa 'dho -mɔ -a -bha kö -waan -dhe yö -waan 'wun ma 'iin -waan 'ta 'sü bhë -an gba -sü -zü. ²¹Me -nu 'wo bhë waa 'dho go 'zü wo -bha me zë -sü -nu, 'gina kë -sü -nu, =sɔɔɔ kë -sü -nu 'iin -an -bha -kwaan -sü -nu -an -zü.

-Zlan -bha bome waa- 'sëédhe -be 'tee do

10 ¹=Dhe =ya kë 'dhö, a -Zlan -bha bome do 'piigbeezë -yö, kö -yö 'go -na dhang- 'gü. Dha kpö -yö -kë -a -bha, 'ö dhabhüö do 'dho -nië -a -gɔ -zü -sü 'ka. -A wöödhë -yö -kë =ne lan- 'dhö; 'ö- -gen -nu -wo -kë =ne 'siö =gban 'lü 'dhö. ²'Yö 'sëédhe -be 'tee do 'ö- 'dhi 'dho 'po -sü 'ka, 'yö -kë -a kwæ. 'Yö ö =kwæ- 'gü -gen yö 'yoo -ta; 'yö ö =kwaal- 'gü -gen yö 'se -ta. ³'Yö -gbla 'gbee- 'ka =ne =laa' -bha pë =bhöü- =mæ' -wo 'dhö. =Dhe =ya yën 'we -sü -bha, 'ö dha 'slaple -wo -we =ne me -we =dhɔɔ -wo -bha 'gbee- 'ka. ⁴=Dhe 'ö =wa yën 'we -sü -bha, 'a dho 'a -ya pë -ya -sü -bha. 'Kæ a -wo do 'bhaa -ma dhang- 'gü, 'yö- pö n -dhë: «-Bhö pë 'ö dha 'we -wo 'slaple -wa pö bhë, -a -ta -bin; kö =kun 'ü- =bæɛn!»

⁵=Dhe =ya kë 'dhö, 'ö -Zlan -bha bome 'a- yö kö =ya =luu- 'yoo waa- 'se -an -ta bhë, 'yö ö =kwæ- 'gü -kɔ =luu dhang- 'gü =zian'. ⁶'Ö ö -wo -bhö -Zlan 'ö -dhö =toëpö 'ka, 'ö dhang- waa- pë -nu 'wo- 'gü 'töüdhö, 'se waa- pë -nu 'wo -an -ta 'töüdhö, 'yoo waa- ö =bhaapë -nu 'töüdhö -an -kë bhë -a 'tɔ 'ka. 'Ö

-Zlan -bha bɔmɛ bhë 'yö- pö: «'Töng gbe yaa 'dho kë -dhö kö -waan dɔ -a -gɔ. 7'Kɛɛ yi 'ö -Zlan -bha bɔmɛ kë 'slaple -naa 'dhoë- 'truu -piö -a 'ka bhë -nɛ 'ö -Zlan dho ö bha 'slë 'yö -bin -sü 'ka -a 'dhiö -mɔ -a 'ka 'kuë -nɛ -kɔ 'ö- -bleɛ -a 'ka ö bha yuökémɛ -nu 'wo- 'dhiwopömɛ -nu 'ka -an -dhë bhë -a 'dhö.»

8'Yö -wo 'a- ma 'ö go dhang- 'gü bhë, 'ö 'wun -bleɛ n -dhë 'zü -dëüwo -nɛɛ: «-Bhö 'dho 'ü 'sëédhe -be 'teete 'ö- 'dhi 'dho 'po -sü 'ka, 'ö -Zlan -bha bɔmɛ mɛ 'ö dɔ -sü 'ka 'yoo waa- 'se -an -ta -a -gɔ bhë, 'ü- 'sü -a -gɔ!» 9'A dho -Zlan -bha bɔmɛ bhë -a 'piö 'a- pö -a -dhë -yö n gbaa 'sëédhe -be 'teete bhë -a 'ka; 'yö- pö n -dhë: «-Bhöë 'sü, 'ü- -bhö! -Yö -dho kë 'slëenslën ü dhiö -nɛ 'zɔ 'yɔn 'dhö, 'kɛɛ 'bha yën -a =yɔɔ' -sü -bha, -yö -dho kë 'güüzë ü 'guu.» 10'Ö 'sëédhe -be 'teete bhë, 'a- sü -a kwɛɛ, 'a- -bhö. -Yö -kë n dhiö -zian' 'slëenslën -nɛ 'zɔ 'yɔn 'dhö; 'kɛɛ =dhe 'ma yën -a =yɔɔ' -sü -bha, -yö -kë 'güüzë n 'guu.

11=Dhe -kë 'pö 'wo- pö n -dhë: «Ü -dho ko 'zü 'ö -Zlan -yö pë bho -bin -blü ü -dhë, 'ö -gban 'segɔ -nu waa- 'ö 'gü -mɛ -nu, -wo =suu'- 'oo =suu'- waa- gludë -nu -an -bha 'ü- -bleɛ 'zü.»

'Wun 'ö -gban -goo- -ple -nu -bha

11 1=Dhe =ya kë 'pö, 'wo -dhe -nu -dan -a 'ka 'lü 'në do nu n -dhë 'ö 'wo- pö n -dhë: «-Bhö -luu'-, kö -Zlan -bha 'kɔ waa- -a -bha slabhodhe bhë, 'ü -an dan -a 'ka; mɛ -nu 'wo -Zlan gba -na -a -gɔ kɔɔ bhë -an -dhong'-! 2'Kɛɛ -bhö 'ü -kwaá' -Zlan -bha 'kɔ 'kweandhe plaandhe -zü; kö -kun 'ü- dan, bhii -yö nu -sü 'ka mɛ 'waa -Zlan -bha mɛ -nu 'ka -an -dhë, kö pödhe 'slööslö 'ö Zeluzalemë 'ka bhë -waan -a -siö'- 'su 'gɔɔ- -yiisië ö ga -ple -bha. 3A -dho ma =goo- -ple 'ö ga -ta -sɔ 'dhö -an -bha -an bɔ kö -waan -Zlan 'dhi -wo -bleɛ'-, -dhekpɔyɪ -vuu do ö -ta -ple waa- -dhekpɔyɪ 'gɔɔ- 'slado (1.260) -an 'ka.»

4=Goo- -ple 'wo bhë 'wo tɔɔ olivie -lü -ple waa- -labang -ple 'wo dɔ -sü 'ka kwa Dëme -Zlan 'ö 'kpongtaa kë -mɛ 'ka -a 'dhö. 5Mɛ =yaa- pö 'yö 'wun yaa kë -an 'ka, 'siö -yö -go -an dhiö 'ö -an yaagüme 'gü -siö; -kɔ bhë -nɛ 'ö mɛ -nu 'wo 'dhoë- 'wun yaa kë -an 'ka 'wo dho gaa. 6-Kɔ -mɔ 'wuën- -sü -yö -an -gɔ kö -waan dhang- 'dhi ta, -yö kë 'dhö kö -kun 'ö dha dho ban 'töng 'wo dho -Zlan 'dhi -wo -bleɛ -a 'ka bhë -a 'ka; -kɔ -mɔ 'wuën- -sü -yö -an -gɔ kö -waan 'yi -nu 'gla fei 'gü. -Kɔ -mɔ 'wuën- -sü -yö -an -gɔ 'pö kö -wo 'wun 'gbee- -nu wɔ 'kpongtaadhe -ta -kɔ =suu'- 'oo =suu'- -ta -nɛ -kɔ 'ö -dhi -a 'ka -an -dhë -a 'dhö.

7Yi 'wo 'dhoë- yën wo -bha 'wun =bleɛ' -sü -bha, wü 'ö go -glu 'kpa 'dhi =va 'gü bhë -yö -dho nu -an -gɔ. 'Yö to -a 'gbee- 'ka -an -ta; 'yö -an zë. 8-An -glöö -dho to -kpinngga 'piö pödhe =va 'ö 'wo -an Dëme dɔa -gaatalü -bha bhë -a 'gü. Pödhe 'ö bhë -nɛ 'wo- -ga zlöö -nɛ Sodömë 'iin -nɛ Ezitö -sɛ -an 'dhö. 9Mɛ -nu 'wo 'segɔ 'saadhö 'gü, 'wo 'gunng 'saadhö 'gü, 'wo

-wo =suu'- 'oo =suu'- pö waa- 'següme -nu 'saadhö -wo -dho -an -glöö -ga -dhekpaayi -yaaga waa- ö 'gbu 'ka 'ö waa 'dho 'we -a -bha kö -wo -an -glöö -bin. ¹⁰'Següme -nu =zuö' 'glu dho dhi me =ple 'wo bhë -an -bha ga -sü -wun 'gü. -Wo -dho =zuögludhi kë, 'wo gbaɔ -nu bɔ wo 'ko -nu -dhë, bhii 'ö tɔɔ -Zlan 'dhiwopöme =ple 'wo bhë kö =wa 'següme -nu dɔ -gboudhö. ¹¹'Kee -dhe -dhekpaayi -yaaga waa- ö 'gbu 'ö bhë =ya ziö, 'ö -këdhösü 'tëë 'yö go -Zlan 'piö 'yö -da -an 'gü, 'ö 'wo =luu 'wo dɔ wo -gen -ta. 'Ö 'suö =va -yö -da me -nu 'wo wo 'yan dɔ -an -bha -an 'gü. ¹²'Ö -Zlan 'dhiwopöme =ple 'wo bhë 'wo -wo do 'gbee- 'yö go dhang- 'gü -a ma =nɛɛ: «-Ka -da zö!» 'Wo -da dhang- 'gü, dha kpö 'ka kö -an yaagüme -nu -wo -an -ga -sü 'gü. ¹³-A 'töng gia- bhë -a 'ka 'sezluundhe 'gbee- -yö -kë; 'ö pödhe bhë -a 'gü -kan 'kou kpö kë 'gɔɔ- do -naa bhë 'ö- 'ple -yö -lo. 'Ö me -lü -vuu 'slaple -wo ga 'sɛ -bha =zluun -sü do bhë -a =kwaä'. Me -nu 'wo to, 'suö -yö -da -an 'gü; 'wo yö -Zlan 'yö dhang- 'gü -a 'tɔ -kë =va -sü -bha.

¹⁴'Yena -wun kë =ple -naa =ya ziö; ('kee -ka ka -zo kë ka -de 'piö!) -A kë -yaaga -naa -dho nu.

'Truu kë 'slaple -naa

¹⁵=Dhe =ya kë 'dhö, 'ö -Zlan -bha bɔme kë 'slaple -naa -yö 'truu -piö; 'ö -wo -nu -wo -we 'gbee- 'ka dhang- 'gü 'wo- pö: «-Gludëdhe kë -sü 'ö 'kpongtaa zö =nɛ =ya 'to kwa Dëme waa- Klito -an -bha 'ka zlöö. -Yö -dho 'kpongtaadhe =kɔɔn =toëpö 'ka!» ¹⁶'Yö me ziizii 'gɔɔ- =ple ö ga -yiisië 'wo -kë -yaannu =süë' wo -bha 'gɔ -gbloo 'gü -Zlan wö 'dhiö bhë 'wo -gblü 'sei, 'ö 'wo -Zlan gba ¹⁷=woë' =nɛɛ: «Yi Dëme -Zlan 'piigbeeze, bhi 'ü -kë -dhö, 'ü -tun -dhö, yi ü zuö -pö ü -bha -kë =va -sü 'ü- wo 'piigbeedhe 'ka, 'ü ü -bha -gludëdhe -kë bhë -a -wun 'gü. ¹⁸-Dɔ 'yënnng -sü -yö 'següme -nu -pa; 'kee -a yi =ya -lo kö ü -bha -naazuëdhe bhë -a 'piö -pë -yaan kë kö game -nu -bha za -yaan 'kan. -A yi =ya -lo kö 'üën- ü bha yuökëme -nu 'wo ü 'dhi -wo -bleɛ waa- me -nu 'töüdhö 'wo ü -bha 'ka 'wo -suö ü -dhë -yö me =va 'ka 'iin -yö me 'tee 'ka 'üën- me 'ö -dhö -a =saan' bho. Me -nu 'wo 'kpongtaadhe 'gü =siö bhë, -a yi =ya -lo kö 'üën- -an 'gü =siö' -pö.»

¹⁹=Dhe =ya kë 'pö 'ö -Zlan -bha 'kɔ 'ö dhang- 'gü bhë, 'ö- 'dhi -yö -po. 'Ö me -nu -wo -Zlan -bha tɔng =gbëü yö -a -gɔ kɔɔ mü. 'Yö dha -bha 'yan bɔ -sü -nu, pë -drinnng -nu, dha -bha 'gbla -wo -nu, 'sɛ -bha =zluun -sü waa- mëngga 'gbee- -bha -lo -sü -wo -kë.

Dhebo 'ö 'gina -yö -ziö -a 'piö

12 ¹'Ö =duakëpë do =va -yö -wo dhang- 'gü: Dhebo do 'ö lan- -da 'ö -bha =nɛ sɔ 'dhö 'ö 'su 'dho -a -gen =löö, 'go mü 'ö 'gɔ =gblaä' 'ö 'susongga 'gɔɔ- do ö ga =ple 'dho -a -bha 'yö -kë -a tuö. ²-Yö -kë dhe 'guzë 'ö koyigadhe =yaa- 'kun -a 'ka; -yö -kë =gblaä 'gbla -dhia koyigadhe 'yënnghädhe =kwaä'.

3'Ö pé do 'bhaa -yö -wo dhang- 'gü 'zü: -Yö -kë 'gina do -ziizë bun nueazë 'ö- -gɔ -nu 'dho 'slaple -a 'ka. -A -sö -nu -wo -kë 'gɔɔ- do. 'Ö 'gɔ -gblaa' 'dhö -ya -sü 'ka -a -gɔ 'ö -dhö do do 'ka -a -bha. 4-A weng bhë -ne 'ö 'susongga -nu 'wo dhang- -bha, -an 'gügludhe -yaaga -kɔ 'pian do bho -a 'ka dhang- 'gü 'ö -zuë' sia-. 'Yö dɔ dheɔ 'ö koyiga -yaa- 'kun bhë -a 'dhiö, kö -ya kë -ne -ya 'bë bho 'yaan- -a -bha 'në -yɔɔ'- . 5'Ö dheɔ 'ö bhë 'yö 'në gɔɔn- do kpɔ. Yö -ne 'yö dho 'dhiö -sü 'següme -nu 'ple 'ka -piö 'gblɔɔngblɔn do 'ka. 'Këe 'në bhë -wa -sü 'wo dho -a 'ka -Zlan 'piö -a -bha 'gɔ -gblɔo 'sɔɔ. 6Dheɔ 'ö bhë -yö -duë, 'ö dho 'yënnng -taa, -dhe 'ö -Zlan -ya -yadhe do -kë -a -bha kö -waan -bhöpë nu -a -dhë -dhekpaɔyi -vuu do ö -ta =ple waa- -dhekpaɔyi 'gɔɔ- 'slado -an -bha bhë -a -bha.

7=Dhe -ya kë 'dhö, 'ö 'ko do -yö -luu dhang- 'gü. Miselö 'ö -Zlan -bha bɔme -nu -gɔme do 'ka bhë 'dhö -Zlan -bha bɔme -nu me 'wo- -kɔ -löö, waa- 'gina 'dhö, ö -bha bɔme -nu 'dhö, 'wo 'ko -ya 'kuë. 8'Këe -wo -to -a 'gbee- 'ka 'gina -ta 'ö -yadhe yaa kë -dhö yö 'dhö waa- ö -bha bɔme -nu 'dhö -an -gɔ kö -waan 'to dhang- 'gü gbɔ. 9'Gina -ziizë 'ö bhë, 'wo- -zuö plaan. Yö -ne 'ö tɔɔ =mëe zii, 'ö 'wo- -dhe zlöö dü 'iin Satan 'yö 'kpongtaame -nu 'ple -püö -na -ne. 'Ö yö 'dhö waa- ö -bha bɔme -nu 'dhö, 'wo -an -zuö 'kpongtaa.

10'Go mü 'a 'we -wo do 'gbee- 'ö go dhang- 'gü -zian' -a ma 'ö- pö: «Dha -sü, 'piigbeedhe waa- -gludëdhe kë -sü 'ö kwa -bha -Zlan -bha 'ka waa- -wogbiindhe 'ö- -bha Klito -bha 'ka =wa yö -dhepuudhe 'gü. Bhii me 'ö za -lo -na kwa dhegluzë -nu tuö -Zlan wö 'dhiö gbeng waa- lënnng bhë, =waa- kë, =waa- =zong' -ya 'go dhang- 'gü. 11Dɔ 'ö 'bhlanë fei -ya wo -an -gban -gɔ waa- 'wun gia- 'ö bhë -a =blëe'- 'wo- wo bhë -ne 'ö kwa dhegluzë -nu -wo bɔ -a -ta 'wo to -a 'gbee- 'ka bhë. -Wo wo -kwaa wo -de -wun -zü 'ö 'wo -an zë -a -wun 'gü. 12-Dhe -kë 'dhö, dhang- 'gü -dhe -nu, -ka =zuögludhi kë, me -nu -de 'pö 'ka dhang- -nu bhë -an 'gü, -ka =zuögludhi kë! 'Këe -më 'yena -wun 'ö dho kë 'kpongtaadhe waa- 'yooga -an -bha 'ka -ne -oo! Bhii 'ö tɔɔ dü 'yö -yɔɔ ka 'piö bhë, -yö pa -sü 'ka -naazuëdhe 'ka ka buëndhö 'ö tɔɔ -ya -dua' -ne 'töng 'yö- -gɔ bhë -ya 'to 'tee.»

13=Dhe 'ö 'gina -yaa- dɔa -ne 'ya -zuö 'kpongtaa 'ö yö -ziö dheɔ 'ö 'nëgɔɔnzë kpɔ bhë -a 'piö -sü 'gü. 14'Yö pé 'yö -kë -ne 'gblübbhaa gban -ple 'dhö 'wo- nu dheɔ bhë -a -dhë kö -yaan -lö -yaan 'dho ö -yadhe -bha 'yënnng -taa -bin -sü 'ka =mëe -bha -glu -da -a -ta -sü -gɔ; -dhe bhë -ne 'wo dho -bhöpë nu -a -dhë -a -bha, -kwe -yaaga waa- ö 'gbu 'piö. 15'Yö -mëe -yö ö 'dhi -po 'ö 'yi 'ö -ziö -ne 'yiga 'dhö -yö -ziö dheɔ 'ö bhë -a 'piö, -yö kë 'dhö kö 'yi -zuö =va -yö ziö -a 'ka. 16'Këe 'se -yö -nu dheɔ bhë -a -dhë. Bhii 'se -yö ö 'dhi -po 'ö 'yi 'ö go 'gina dhiö bhë, 'ö- -yɔɔ. 17'Ö- -wun -yö -na 'gina bhë -a -zuë dheɔ bhë -a buëndhö. 'Yö dho 'ö 'ko -ya dheɔ bhë -a -suu'- -ta -nu, me -nu 'töüdhö 'wo -Zlan -bha tɔng =bhlë -ya, me -nu 'ö 'wo dɔ -sü 'ka Yesu -wun -dhe 'wun gia- -sü 'gü -an -bha. 18'Ö 'gina -yö dho 'ö dɔ 'yoo 'kpong 'dhiö.

'Wun 'ö -gban wü -ple -bha

13 ¹Go mü 'a wü do yö kö -yö 'go -na 'yoo -bhaa. -A -sö -yö -kë 'gɔɔ- do, 'ö- -gɔ -nu 'dhö 'slaple; 'ö 'gɔ =gblaa' 'dho -a -sö 'ö -dhö do do 'ka -a -bha. 'Ö 'tɔ do 'ö 'si -bho -Zlan -gɔ -tɔ 'ka 'yö -ya -sü 'ka -a -gɔ -nu -bha. ²Wü 'ö bhë -yö -bho 'gɔɔ- -bha. -A -gen -nu -wo -kë =ne -tɔn -bha gben- -nu -gen 'dhö, 'ö- dhiö -dhe -yö -kë =ne -laa' dhiö -dhe 'dhö. 'Yö 'gina do 'ö -sia bhë 'yö 'ö -bha 'piigbeedhe 'dhö, 'ö -bha 'gɔ -gbloo waa- 'ö -bha -kɔ -mɔ 'wuën- -sü =va bhë 'ö- nu -a -dhë. ³Kpa do =va 'gblüünzë -yö -kë wü bhë -a -gɔ -nu do -bha. Me 'ö 'yan =ya -da -a -ta kö =ya kë -a 'yaan =ne bhüö 'ö- 'kpa 'dhö bhë, pë 'ö wü 'ö bhë 'ö dho to =a -kwaaw' -bezë yö -mü. 'Këe wü bhë bhüö 'ö dho kë -a ga -gen 'ka -be bhë, -yö -dha -a -gɔ. 'Ö 'kpongtaame -nu 'saadhö 'wo -da =zuögludhi 'gü, 'wo -ziö wü 'ö bhë -a 'piö. ⁴Ö me -nu 'saadhö 'wo yö 'gina 'ö bhë -a gba -sü -bha, bhii 'ö tɔɔ -yö 'ö -bha -kɔ -mɔ 'wuën- -sü -nu wü 'ö bhë -a -dhë. 'Ö 'wo yö wü 'ö bhë -a gba -sü -bha 'pö -a pö -sü 'ka =nɛ: «Dö 'yö dho kë =ne wü 'ö =ne -a 'dhö e? Dö 'ö dho -mɔ -a -bha kö -yaan 'ko zë -a 'ka e?»

⁵Ö wü bhë 'wo zian nu -a -dhë, 'yö -de -sü =va -wun -nu =blɛɛ, 'ö 'si -nu bho -Zlan -gɔ; 'ö -kɔ -mɔ 'wuën- -sü yö kö pë -nu 'wo =ne -yaan -an kë 'su 'gɔɔ- -yiisië 'ö ga =ple 'piö. ⁶Ö yö 'si -bho -Zlan -gɔ -sü 'gü, -a 'tɔ -gɔ 'gü zë -sü 'ka, 'wun -nu -dɔ yö 'dhö, -dhe 'ö- -bha waa- me -nu 'wo dhang- 'gü 'töüdhö -an -bha -sü 'ka. ⁷Ö zian -yö nu -a -dhë, kö -yaan -glu gɔn -Zlan -bha me -nu 'slööslö 'ka -yaan 'to -a 'gbee- 'ka -an -ta; 'yö -kɔ -mɔ 'wuën- -sü yö 'gunng 'saadhö, 'següme -nu 'saadhö waa- -wo =suu- 'saadhö -a pö -me -nu -ta. ⁸Kpongtaame -nu 'saadhö -wo -dho -a gba; 'këe me -nu 'wo dho -a gba 'wo tɔɔ me -nu 'ö 'kpongtaadhe züdüyi 'ka, 'ö -an 'tɔ yaa -ya -sü 'ka 'bhlanë 'wo- zë bhë -a -bha -toëpö -këdhösü 'sëédhe -be bhë -a 'gü bhë.

⁹-Ka ka 'to 'to -së 'ka! Me 'ö- 'wun ma -to 'dhö -dhö, -yö 'wun 'ö =ne -a ma. ¹⁰Me -nu 'wo -Zlan -bha 'segügüme -nu 'ka bhë, -a me -nu 'wo dho kë -kanso 'kɔɔme 'ka, -wo -dho dho -an 'ka -kanso 'kɔɔdhö. 'Ö- me -nu 'wo dho kë 'pö -zë -dhaa 'ka -me 'ka, 'wo dho -an zë -dhaa 'ka. -A -wun 'gü, -yö -Zlan -bha me 'slööslö -bha kö -wo bɔ 'wun 'gbee- 'gü, =zuö' -kë -saa -sü waa- -zo yö -sü -an 'ka.

¹¹Go mü 'zü, 'ö wü 'waa gbe 'ö- -sö -yö -kë =ne 'bhlanë -nu -sö 'dhö, 'ö- 'we -wo -yö -kë -ziizë =ne 'gina -wo 'dhö bhë, 'a- yö kö -yö 'go -na 'seidhö, ¹²Ö wü -blëezë -bha -kɔ -mɔ 'wuën- -sü 'gü -pë -nu -kë -a wö 'dhiö mü. 'Ö 'sɛ waa- 'ö 'gü -me -nu 'gbee- -ta bho -yö kë 'dhö kö wü -blëezë 'ö- -bha bhüö 'ö dho to -a -kwaaw' -be 'ö bo bhë, -waan -a gba. ¹³Wü kë =ple -naa 'ö bhë, -yö -dhidhaapë =vava -nu -kë; -a do 'bhaa tɔɔ -ya -kë 'ö 'siö -yö go dhang- 'gü 'yö =yɔɔ 'kpongtaame 'ple wö 'dhiö. ¹⁴Ö 'kpongtaame -nu 'ple -püö, -kɔ -mɔ 'wuën- -sü 'ö -dhidhaapë -nu kë -na -a 'ka bhë -a -kwaaw' wü -blëezë bhë -a wö 'dhiö. Bhii pë -nu bhë =ne 'wo- -wo -kë 'gbiin- 'kpongtaame -nu

wö 'dhiö, 'ö bɔ -a -ta 'ö- pö -an -dhë, wü 'ö yaa ga gbɔ -gi 'ö- wo -a -kwaaw'
 bhë, -wa 'bin -va do do. ¹⁵Wü kē -plē -naa 'ö bhë -yö zian -yö kö -yaan
 -këdhösü nii -da wü -blëezë 'bin bhë -a 'gü, -yö kē 'dhö kö pē 'bin 'ö bhë
 -yö 'we 'iin kö mē -nu 'saadhö 'ö waa 'dho we -a -bha kö -waan -a gba, -yö
 -an zë. ¹⁶Wü 'ö bhë -yö -dhö mē -nu 'saadhö, -yö 'në 'tee 'ka 'iin -yö mē -va
 'ka, -yö -bhɔɔmē 'ka 'iin -yö 'fëemē 'ka, -yö 'gan 'ka 'iin 'yaa 'gan 'ka, -an 'plē
 'gbee- -ta -bho kö mē 'ö -dhö -wo =duakëpë do kē -a kwæ 'gü -kɔ -bha 'iin
 -a -kpong 'gü. ¹⁷Mē gbë yaa kē -dhö kö -yaan pē 'dho 'iin pē 'dhɔɔ do, kö
 =duakëpë 'ö bhë yaa kē -a -bha. =Duakëpë 'ö bhë 'ö tɔɔ: Wü 'ö bhë -a 'tɔ 'iin
 'nimlo 'ö nu -sü 'ka 'ö waa- wü 'ö bhë 'ö -an 'tɔ dhö dho 'ko 'piö.

¹⁸-Dhe 'ö -nɛ 'ö tɔɔ 'kpaakpadhe -zɔn -dhe. Mē 'ö 'wun -bho 'kou do,
 'nimlo 'ö -nɛ -ya -dho 'kuë- -sü -dhong'- bhii 'nimlo 'ö bhë waa- gɔɔn- do 'tɔ
 -wo -dho 'ko 'piö. -A -dho 'kuë- -sü 'ö tɔɔ =këng' 'slado -kɔ 'slado ö ga 'slado
 (666).

'Bhlanë waa- mē -nu 'ö -an -dho

14 ¹=Dhe =ya kē 'pö 'a -dhe -ga; 'a 'bhlanë yö kö -yö do -sü 'ka Siɔn
 -tɔn tuö. Mē -lü -vuu =këng' do ö -kɔ -yiisië waa- mē -lü -vuu -yiisië
 (144.000) -wo kē -a 'piö mü. -A 'tɔ waa- -a Dë 'tɔ -wo -kē -ya -sü 'ka -an
 -kpong 'gü. ²'Ö -wo do -yö go dhang- 'gü 'ö -we -nɛ 'yi -va -zuö 'iin dha
 'we -drinng 'dhö, 'a- ma. 'We -wo 'a- ma bhë -yö -bho kɔngzëme -nu -bha
 kɔng -wo -bha. ³Mē -lü -vuu =plëezë 'wo bhë -wo -kē do -sü 'ka 'gɔ -gbloo
 bhë 'dhö, pē 'bhee- -yiisië waa- mē ziizii -nu 'wo bhë -an wö 'dhiö 'ö 'wo
 yö 'tan -dëü bho -sü 'gü. Mē gbë yaa kē -dhö kö -yaan 'tan -dëü bhë -a
 -daan'- -yaan -a bho -a 'ke yaa kē mē -lü -vuu =këng' do ö -kɔ -yiisië waa-
 mē -lü -vuu -yiisië 'ö Yesu -yö -an -gɔ -ta -bɔ =sɔɔn yaa -gɔ 'kpongtaa bhë
 -an 'ka. ⁴Mē 'wo bhë waa wo -de kē -dhuuzë dhoo -nu 'piö, -wo wo -zo -kē
 wo -de 'piö 'wo to 'slööslö. -Dhe 'saadhö 'ö 'bhlanë bhë 'ö dho -a -bha, -wo
 -ziö -a 'piö. -Wo -an -dho mē -nu ziën kö -waan kē mē -nu 'wo dho dho -an
 'ka -Zlan waa- 'bhlanë -an 'dhiö -a 'ka. ⁵Waa- ma -an 'dhii do kö -wo =sua
 -wun =blëe' -na; 'wun yaa gbë 'yaa -an -bha.

'Wun 'ö -gban -Zlan -bha bɔmē -nu -yaaga -bha

⁶'Go mü 'a -Zlan -bha bɔmē do 'waa gbë yö kö -yö ziö -sü 'gü plaan 'puu
 'piö dhuö -gbiin. =Toëpö -këdhösü -wuntaɔsë -yö -kē -a -gɔ kö -yaan nüë
 mē -nu 'wo 'kpongtaa 'ö 'wo 'se 'saadhö 'gü -mē -nu 'ka, 'gunng 'saadhö
 'gü -mē -nu 'ka, -wo =suu'- 'saadhö pö -mē -nu waa- 'segɔ 'saadhö 'gü -mē
 -nu -an -dhë. ⁷-Yö -kē -a pö -dhiadhö -wo 'gbee- 'ka =nɛɛ: «-Ka 'suö -Zlan
 -dhë, 'ka- 'tɔ bho! Bhii 'tɔng 'yö dho mē -nu -bha za kaan bhë -ya -lo. Yö 'ö
 dhang-, 'se, 'yoo waa- 'yigɔ -an 'plē -kē bhë, -kaa gba!»

⁸=Dhe go mü, 'ö -Zlan -bha bɔmē kē =plē -naa -yö nu -a pö -sü 'ka =nɛɛ:
 «Babilonë -pö =va bhë =ya =siö'-, -ka -dhe -ga, =ya =siö'-! =Ya =sɔɔn kē -sü

-pen 'se 'saadhö 'gü -ne -ko 'ö 'wo -drɔɔn 'yi nu -na -a 'ka me 'ple -dhë -waa- mü 'ö -an kē -na bhë -a 'dhö!»

⁹Ö -Zlan -bha bɔme kē -yaaga -naa -yö -wo kö -a me -ple 'wo 'dhiö bhë =wa ziö. -Yö -kē -a pö -sü 'gü -wo 'gbee- 'ka -nɛɛ: «Mɛ 'ö 'dhoë- wü bhë -a gba -yaan -a 'bin gba, 'go mü -waan -duakëpë -ya -a -kpong 'iin -a -ko -bha, ¹⁰yö -de 'pö, -Zlan -bha -naadhe -dhö nu -a -ta. -Zlan -bha -naazuédhe bhë -yö -kē -nɛ -drɔɔn 'yi 'ö 'yaa -kaan 'kuë -sü 'ka 'ö yö gia- 'ö- -lo ö -bha -naazuëpë 'ka, yö -mü. Mɛ 'oo me 'yö 'dhoë- -a kē -nɛ -ko bhë -a 'dhö, -wo -dho -a -zuö blɔɔn 'tëë yaazë bhë -a 'siö 'gü, 'go mü 'ö- 'yënnng dho bho -Zlan -bha bɔme -nu 'slööslö waa- 'bhlanë -an wö 'dhiö. ¹¹Siö 'tëë 'yö dho -an 'yënnng bho bhë, -yö -dho kē -dhö =toëpö =toëpö 'ka. Mɛ -nu 'wo 'dhoë- wü bhë waa- -a 'bin -an gba, 'iin 'ö- -bha =duakëpë 'dhoë- kē -an -bha, 'tɛɛpadhe yaa 'dho kē -an -gɔ lënnng -nu waa- gbeng -nu -an 'ka.»

¹²Dhe 'ö -nɛ 'ö tɔɔ -Zlan -bha me -nu 'slööslö 'wo 'dhoë- -a -bha tɔng kun 'go mü -waan wo -zo yö Yesu -bha, -an -bɔ 'wun 'gbee- 'gü -dhe 'ö dho kē =zuösaadhe 'ka.

¹³'Go mü 'ö -wo do -yö bɔ dhang- 'gü 'ö- pö n -dhë: «'Sëédhe 'sü 'ü pë =bɛɛn'- -a 'gü -nɛɛ: 'Go =dɛɛ -bha, =zuögludhi -yö kē me -nu 'wo 'dhoë- to -klu -sü 'ka Dëme -bha -yaan yöë -an -bha ga -sü -bha -an -gɔ!» 'Ö -Zuu 'slööslö -ya -pö: «-Yö 'wun gia- 'ka, -wo -dho wo 'tɛɛ pa wo -bha yuö 'gbee- kē -sü -gɔ bhii -an -bha 'wun -së kē -sü =saan'- -dho bho 'ma.»

'Sɛ -ta dhuö -pë 'kan -sü

¹⁴Dhe 'a- ga 'zü, 'ö 'a dha kpö 'puu do yö; 'ö pë 'ö -kē -nɛ me -lü 'dhö 'a- yö kö -yö -ya -sü 'ka -a -ta. 'Sënnng 'gɔ =gblaa' do -yö -kē -a -gɔ -bha, 'ö 'gbuë- 'kan -dhaa do 'dhiözë 'dho -a kwɛɛ. ¹⁵Yö -Zlan -bha bɔme do 'bhaa -yö go -Zlan -gba -a 'gü -ko 'gü 'yö yö plaan, 'yö yö 'wun -blɛɛ' -sü -bha -wo 'gbee- 'ka me 'yö -kē -ya -sü 'ka dha kpö -ta bhë -a -dhë 'ö- pö: «-Bhö ü -bha -dhaa 'në 'sü, 'ö me -nu 'wo 'kpongtaa, 'ü -an 'dho 'kuë- -nɛ -dhe 'wo -mlü -kan bhii -mlü =ya ga. -A 'kan -yi -ya -lo.» ¹⁶Dhe -ya kē 'pö 'ö me 'ö -kē -ya -sü 'ka dha kpö -ta bhë 'yö nu ö -bha -dhaa 'në 'ka, -yö yö yuö kē -sü -bha -nɛ me -mlü -kan, 'ö- 'ple -kan.

¹⁷Ö -Zlan -bha bɔme 'bhaa 'ö yö -de 'pö ö -dhaa 'në do 'dhiözë 'dho -a kwɛɛ -yö go -Zlan -gba -a 'gü -ko 'ö dhang- 'gü bhë -a 'gü 'yö yö plaan.

¹⁸Ö -Zlan -bha bɔme do 'waa gbɛ 'ö -ko -mɔ 'wuën- sü 'dhoë- -gɔ 'siö -ta bhë, -yö go slabhodhe -bha -zian', 'yö nu 'yö- pö -wo 'gbee- 'ka me 'ö -dhaa 'dhiözë 'dhoë- -gɔ bhë -a -dhë -nɛɛ: «-Bhö ü -bha -dhaa 'sü 'ü lɛzen -nu 'wo 'sɛ -ta 'ü -an -kpa 'kan -a 'ka, bhii -an -kpa -nu =wa ma.» ¹⁹Ö -Zlan -bha bɔme bhë 'yö ö -bha -dhaa bɔ 'sɛ -ta lɛzen -lü -nu tuö -an -kpa 'kan -sü 'ka, 'yö -an -zuö lɛzen -kpa 'yi -bho -a 'gü -pë 'gü. -Drɔɔn 'yi -bho -a 'gü -pë 'ö bhë 'ö tɔɔ -Zlan -bha -naazuédhe =va. ²⁰-Wo lɛzen -kpa -nu bhë -an =wüü -an 'yi -bho -a 'gü -pë 'gü pö- =taa -bha, 'ö fɛi -glu -yö ziö 'yö dho 'kilong -këng' -yaaga -naa -taa 'ö- -glu =duan' -yö -mɔ 'metrë do waa- ö 'gbu -bha.

-Zlan -bha bɔme -nu 'slaple -bha -nu -Zlan -bha -naazuédhe -kɔɔ -nu 'ka -sü

15 ¹Yö -dhe 'a- -ga 'zü, 'ö pè do 'bhaa 'ö 'wun 'gblüünzè -va 'ka, 'a- yò dhang- 'gü. -Zlan -bha bɔme -nu 'slaple -nɛ 'a -an yò kö -wɔ me -ta -wun 'slaple -wo -an kwɛɛ. -Wɔ me -ta -wun 'slaple 'wo bhè 'wo tɔɔ -an -kaanta -nu 'ö -Zlan dho 'ö bha -naazuédhe 'dhiö -mɔ -a 'ka 'kuè.

²A ko 'zü 'a pè 'ö -kè -nɛ 'yipuè 'dhö 'a- yò. 'Kɛɛ 'yi giagia 'yaa -mü. -Yö -kè -nɛ pè 'wo 'vedhe kè -na -a 'ka 'ö me 'yan 'dho bɔ -na -a 'gü bhè -a 'dhö. 'Yö pè 'ö -kè -nɛ 'siö 'dhö 'a- yò kö -yö -ya -sü 'ka -a 'gü. 'Go mü 'zü 'a me -nu 'wo to -a 'gbee- 'ka wü bhè 'dhö, -a 'bin 'dhö, waa- me 'ö- 'tɔ 'dho 'nimlo 'ka bhè -an -ta bhè, -an yò kö -wo dɔ -sü 'ka pè 'bhlöngbhlöng bhè -a 'dhiö, kö -Zlan -ya kong -nu nu -an -dhè. ³-Wo -kè Moizö 'ö -kè -Zlan -bha yuökème 'ka bhè -a -bha 'tan 'ö- bho -Zlan 'tɔ bho -sü 'ka waa- 'tan 'ö bho 'bhlanè 'tɔ bho -sü 'ka bhè -an bho -dhia, -a pö -sü 'ka -nɛɛ: «Yi Dème, -Zlan 'piigbeezé, ü këyuö -nu -wo =va, 'ö 'wo 'gblüünzè; 'se 'saadhö -bha -gludè, ü -bha 'slè -nu -wo kpengdhö 'ö 'wo 'wun gia- 'ka. ⁴Dö 'ö yaa 'dho suö ü -dhè -ɛ, yi Dème? Dö 'ö yaa 'dho we -a -bha kö -yaan ü 'tɔ bho =ɛ? Bhii bhi do -nɛ 'ü 'slööslö. 'Setame -nu 'saadhö -wo -dho nu 'wo -gblü ü 'dhiö ü gba -sü 'ka, bhii ü këwun -nu 'wo kpengdhö bhè =wa yò -dhegbéadhe 'gü.»

⁵=Dhe 'ö pè -nu 'wo bhè =wa ziö, -Zlan -gba -a 'gü -kɔ 'ö dhang- 'gü bhè, 'a- yò kö -a 'dhi -ya 'po -dhe 'slööslö -dhe =duö 'ö -Zlan 'dhö -ya -sü 'ka -a 'gü bhè -a -zü. ⁶-Zlan -bha bɔme -nu 'slaple 'ö -wɔ me -ta -wun 'slaple 'dhö -an -gɔ bhè, -wo -go -Zlan -gba -a 'gü -kɔ 'gü, 'wo yò plaan; -wo -kè 'dhu -sü 'ka sɔ 'puu 'ö 'bhü -sü 'ka -a 'ka; 'ö 'sënnng -du kwi 'dho ziö -sü 'ka -an -kënnng 'gü. ⁷'Ö pè 'bhee- -nu -yiisiè 'wo bhè 'ö- me do -yö 'sënnng -kɔɔ 'slaple 'ö 'wo pa -sü 'ka -Zlan 'ö 'bhee- -toëpö 'ka bhè -a -bha -naazuédhe 'gü -pè 'ka bhè -a nu -Zlan -bha bɔme -nu 'slaple 'wo bhè -an -dhè. ⁸-Zlan -gba -a 'gü -kɔ bhè -yö -pa 'sion 'ka -Zlan -bha 'tɔbhɔdhe waa- -a -bha 'piigbeedhe -an -kwaa'. 'Ö me gbe yaa kè -dhö -yaan -da -Zlan -gba -a 'gü -kɔ 'ö bhè -a 'gü kö -yö 'dho -yö yöè -wɔ me -ta -wun 'slaple 'ö -Zlan -bha bɔme -nu -wo -nu -a 'ka bhè -a -wun 'plè -yö 'ko 'dhiö -yi -bha.

'Wun 'ö -Zlan -bha -naazuédhe -kɔɔ -nu 'slaple 'gü

16 ¹Go mü 'zü, 'ö -wo do 'gbee- 'ö go -Zlan -gba -a 'gü -kɔ 'gü -zian' 'a- ma; 'ö- pö -Zlan -bha bɔme -nu 'slaple 'wo bhè -an -dhè: «-Ka 'dho 'ka -Zlan -bha -naazuédhe -kɔɔ pa -sü 'slaple bhè -a 'daawo 'kpongtaa!»

²'Ö -Zlan -bha bɔme -blëezè -yö dho 'yö 'ö bha -kɔɔ pa -sü 'daawo 'kpongtaa. 'Ö me 'yënnng bho bhüö =yua' -yö -lo me -nu 'ö wü 'ö bhè 'ö- =dua' 'dho -an -bha, 'go mü 'wo- 'bin gba bhè -an -bha.

³'Ö -Zlan -bha bɔme =plè -naa -yö 'ö -bha -kɔɔ pa -sü 'daawo 'yoo =bhaa. 'Ö 'yi -yö -kè -nɛ me =ya ga -a fèi 'dhö, 'ö pè -nu 'wo 'bhee- 'yoo =bhaa, 'ö -an 'plè -wo ga.

4'Ö -Zlan -bha bɔmɛ kɛ -yaaga -naa -yö ö -bha -kɔɔ pa -sü 'daawo 'yiga -nu waa- 'yigɔ bhɔ -dhe -nu -an -bhaa -dhe -nu -bha; 'ö 'yi -nu -wo -gla fei 'gü. 5'Ö -Zlan -bha bɔmɛ 'ö -wo -kɔ -mɔ 'wuën- -sü 'dho -a -gɔ 'yi -nu -ta bhê 'a- -wo ma -nɛɛ: «Bhi 'ü 'slööslö, bhi 'ü -dhö, 'ü -kê -dhö, ü kpengdhö ü -bha za 'kan -kɔ -nu 'gü. 6Bhi mɛ -nu 'wo ü -bha mɛ -nu 'slööslö waa- ü 'dhiwopöme -nu fei -lo bhê, ü fei 'yi nu -an -dhê 'wo- mü; -yö -dhi -an -bha.» 7'Go mü 'zü, 'ö -wo do 'bhaa -yö go -Zlan -bha slabhodhe -bha 'a- ma -nɛɛ: «=Ii-, 'wun gia- -mü, yi Dëme -Zlan 'piigbeezê, ü bha za 'kan -kɔ -nu 'ple -wo -sê 'ö 'wo kpengdhö giagia 'ka!»

8'Ö -Zlan -bha bɔmɛ kɛ -yiisiê -naa -yö ö bha -kɔɔ pa -sü 'daawo lan- -ta 'ö 'wo zian nu -a -dhê kö -yaan mɛ -nu 'güö 'siö 'ka. 9'Ö mɛ 'bhee- -nu -wo yö 'güö -sü 'gü 'siö -bha dɔdhe 'gbee- -kwaá; 'wo yö 'si -bho -Zlan 'ö -kɔ -mɔ 'wuën- -sü 'dhoê- -gɔ -wɔ mɛ -ta -wun =suu- 'ö bhê -a -ta bhê, -a 'tɔ -gɔ -sü 'gü; waa 'go =zian' wo -bha 'wun yaa 'gü kö -waan -a 'tɔ bhɔ.

10'Ö -Zlan -bha bɔmɛ kɛ 'sɔɔdhu -naa -yö ö -bha -kɔɔ pa -sü 'daawo wü 'ö bhê -a -bha 'gɔ -gbloo 'gü, 'ö -dhe 'saadhö 'ö- -bha -gludêdhekêdhe 'dhoê- -bha 'yö -da -dhetiídhe 'gü, 'ö mɛ -nu -wo yö wo nɛ- -bhö -sü 'gü 'yëngbhɔdhe -kwaá'. 11'Wo yö 'si bho -sü 'gü -Zlan 'ö dhang- 'gü -a -gɔ, wo -bha 'yëngbhɔdhe waa- wo -bha bhüö -nu -wun 'gü; waa 'go wo -bha 'wun yaa -nu 'gü.

12'Ö -Zlan -bha bɔmɛ kɛ 'slado -naa -yö ö -bha -kɔɔ pa -sü 'daawo 'yiga =va 'wo- -dhe öflatö bhê -a -bhaa. 'Ö 'yiga =va bhê 'ö -bhöü kö -yaan zian nu -gludê 'ö go lan- bhɔ =zian' bhê -a -dhê. 13'Go mü 'a -zuu yaa -yaaga 'wo bhɔ 'drɔɔ -bha -an yö: -A do -yö -go 'gina dhiö, 'ö- do 'bhaa -yö go wü dhiö, 'ö- -kaanta -yö go -Zlan -wodhiölome =suazê dhiö. 14'Wo -nɛ 'wo tɔɔ dü -bha -zuu yaa -nu 'wo -dhidhaapê -nu -kê. -Zuu -yaaga 'wo bhê -nɛ 'wo dho -gludê -nu 'piö 'kpongtaadhe 'saadhö -bha, kö -waan -an 'kpɔ 'kuê- kö -glu 'ö dho kɛ -Zlan 'piigbeezê -bha yi =va 'ka bhê -waan gɔn.

15-Ka ka 'to 'to, a nu -na -nɛ -kwaanme -yö nu. 'Gludhi -yö kɛ mɛ 'ö 'dhoê- -ya ö 'yaan -yaan ö -bha sɔ -nu 'kun -sê -a -gɔ, -yö kɛ 'dhö kö -kun 'yö dho to ö 'kpaan 'ka 'ö mɛ -nu dho -a lè- -dhe yö.

16-Zuu -nu bhê -wo -gludê -nu -kpɔ 'kuê- -dhe do 'wo- -dhe Eblö -nu -wo 'gü Aamagedɔn -a -bha.

17'Ö -Zlan -bha bɔmɛ kɛ 'slaplɛ -naa -yö ö -bha -kɔɔ pa -sü -pɛn 'dhung- -ta. 'Ö -wo do 'gbee- -yö -we -Zlan -gba -a 'gü -kɔ 'gü; -yö -go 'gɔ -gbloo 'gü 'yö- pö: «=Ya yën!» 18'Ö pè -bha 'yanbɔdhe -nu, pè -drinng -nu, dha 'we -wo -nu waa- 'sɛ -bha =zluun -sü 'gbee- -wo -kê. 'Ö sü mɛ 'bhee- -da -sü -bha 'kpongtaa 'sɛ yaa =zluun -suu- wo 'dhö do; -a mɛ 'ö -nɛ -yö -kê 'gbee- -duö! 19'Ö 'kwipö ('wo- -dhe Babilönê) bhê 'yö -kan 'gü -yaaga, 'ö pödhe -nu 'wo 'següidhe 'saadhö -nu -bha 'ö -an -bha 'kɔ -nu -wo -lo. -Zlan -zo -yö -bhüö Babilönê -dhe =va 'ka kö -yaan ö bha -naazuédhe =va -drɔɔn -kɔɔ nu -a -dhê -yaan -a mü. 20'Ö 'yi songdhe -nu -wo =dhɔng, 'ö -tɔn -nu -wo

-dhɔŋ mɛ -gɔ. ²¹Mëngga =vava 'ö- do dho -mɔ 'kilong 'gɔɔ- -yiisië -bha bhë 'wo go dhang- 'gü 'wo -lo mɛ -nu -ta. 'Ö mɛ -nu -wo yö 'si -bho -Zlan -gɔ -sü 'gü mëngga -nu 'wo -lo -an -ta 'wun -wɔ mɛ -ta dhe 'ka bhë -a -wun 'gü. Bhii 'ö tɔɔ -yö -kë 'gbee- -ziizë 'ka.

17 ¹Dhe =ya kë 'pö 'ö -Zlan -bha bɔmɛ -nu 'slaple 'ö -kɔɔ pa -sü 'slaple -yö -kë -an -gɔ bhë, 'ö- mɛ do -yö nu 'ö- pö n -dhë: «-Bhö nu kö -ko 'a dho =sɔɔnkédhe =va 'ö pö- =va 'ö dɔ -sü 'ka 'yiga =plëézë 'sɔɔ -a 'klo- bho -a 'ka bhë 'aan- -zɔn ü -dhë. ²Kpongtaa -gludë -nu =wa wo -de kë -dhuuzë -a 'piö, 'go mü 'ö 'kpongtaame -nu =waa- -bha =sɔɔn kë -sü -drɔɔn mü, -a 'yi =ya ziö -an -gɔ.»

³'Ö -Zlan -bha bɔmɛ -yö dho n 'ka 'yënnɔ =taa -Zuu 'slööslö -kwaal'. -Dhe bhë =nɛ 'a dheɔ do yö -a -bha kö -yö -ya -sü 'ka wü nuɛazë 'ö 'si -bho -Zlan -gɔ -tɔ -nu 'dho -lo -sü 'ka -a -bha -a =taa. Wü 'ö 'dhö bhë -a -gɔ -nu -wo 'slaple 'ö- -sö -nu 'dho 'gɔɔ- do. ⁴Dheɔ 'ö bhë, sɔ bun nuɛazë -yö -kë -a -bha; 'ö- 'bhaa -nu -wo -kë 'sënnɔ 'ka, 'ö- 'bhaa -nu -wo -kë -guö 'yan bho -sü -zë -nu 'ka, -zɔɔ -nu -wo -kë -a -bha. 'Sënnɔ -kɔɔ do 'ö -kë pa -sü 'ka pë =lɔɔzë -nu, pë -dhuuzë -nu 'wo- -bha =sɔɔn kë -sü 'piö -pë -nu 'ka -yö -kë -a kwɛɛ. ⁵'Ö 'tɔ do 'ö- -gɛn 'dho -bin -sü 'ka 'yö -kë -ya -sü 'ka -a -kpong 'gü =nɛɛ: Babilônë, 'kwipö =va, =sɔɔnkédhe -nu waa- pë =lɔɔzë -nu 'wo 'kpongtaa -an dhe. ⁶Dheɔ 'ö mɛ 'slööslö -nu waa- Yesu -bha =goo- -nu fei mü bhë, a- -yö kö fei bhë -ya kë -na =nɛ -kɔ 'ö yɔ 'yi 'dhö mɛ kë -na -a 'ka bhë -a 'dhö.

'Ö 'tetundhe =va -yö -da n 'gü n 'yan -bha -dɔ -a -bha -sü 'ka. ⁷'Ö -Zlan -bha bɔmɛ -ya pö n -dhë: «-Më 'yö -kë 'ö ü 'te -yö tun -ii? Dheɔ bhë waa- wü 'ö- -gɔ 'dho 'slaple, 'ö- -sö -nu 'dho 'gɔɔ- do, 'ö -ya -sü 'ka -a =taa bhë, a -dho -a -gɛn 'ö -bin -sü 'ka bhë -a pö ü -dhë. ⁸Wü 'ö bhë -yö -kë 'bhee- 'dhiö -be 'kɛɛ 'yaa 'dhö gbɔ, -yö -dho go -glu 'kpa 'dhi =va 'gü kö -yaan 'dho 'ö 'gü -siö' -zian 'ka. Mɛ -nu 'wo 'kpongtaa 'ö -an 'tɔ yaa -ya -këdhösü 'sëédhe -be 'gü 'kpongtaadhe züdüyi 'ka bhë, -an 'te -yö -dho tun -a -bha -go -glu 'kpa 'dhi =va 'gü -sü 'ka -an 'yaan 'ka. Bhii -yö -kë -dhö, 'yaa -dhö gbɔ; 'kɛɛ -yö -dho -wo 'zü.

⁹-Dhe 'ö =nɛ 'ö tɔɔ 'wundɔdhe waa- 'kpaakpadhe -an -zɔn -dhe. -A -gɔ -nu 'slaple bhë 'wo tɔɔ 'sɛ -tɔn 'slaple 'ö dheɔ 'ö bhë 'ö -ya -sü 'ka -an -ta; -wo -gludë 'slaple 'ka 'pö. ¹⁰-An mɛ 'sɔɔdhu =wa 'go -an ziën; 'waa -dhö gbɔ, -a mɛ do 'tɔ -yö bhɔ -sü 'gü. -A mɛ kë 'slaple -naa yaa nu -kun; =ya kë =nɛ -ya nu, 'töng kpö 'bhle =nɛ 'ö dhoë- kë zö. ¹¹Wü 'ö 'dhiö -bezë 'ö -kë 'bhee- 'ö 'yaa- 'ka gbɔ bhë, yö gia- 'ö tɔɔ -gludë kë 'slɛaga -naa, yö =nɛ 'ö tɔɔ -gludë 'slaple 'wo bhë -a mɛ do 'ö =ya 'ö -bha -gludédhe kë 'saadhö, 'yö 'dho -na 'ö -bha 'gü =siö' -zian 'ka bhë.

¹²-A -sö -nu 'gɔɔ- do 'ü -an yö bhë 'wo tɔɔ -gludë -nu 'gɔɔ- do 'ö waa 'tɔbhɔdhe kë -kun 'kɛɛ -wo -dho -kɔ -mɔ 'wuën- -sü yö wo -bha -gludédhekédhe -bha kö waa- wü bhë -an 'tɔ -yaan bhɔ 'lele do 'piö.

¹³-Dhe 'wo- -bha 'gɔɔ- do, -an -zo -ta -a 'gü -wun -yö do, 'ö 'wo wo -bha 'piigbeedhe waa- -kɔ -mɔ 'wuën- -sü -lo wü bhë -a kwɛɛ. ¹⁴-Wo -dho 'ko -ya 'bhlanë -bha, 'kɛɛ 'bhlanë -yö -dho to -a 'gbee- 'ka -an -ta; bhii 'ö tɔɔ -yö dëmɛ -nu -bha Dëmɛ waa- -gludë -nu -bha -gludë 'ka. Yö 'dhö waa- ö bha mɛ -nu, mɛ 'ö -an -dhɔɔ -kë, 'ö -an sü 'wo -to -a 'piö -mɛ -nu 'ka -wo dho to -a 'gbee- 'ka.»

¹⁵'Ö -Zlan -bha bɔmɛ -ya pö n -dhë 'zü -nɛɛ: «'Yi -nu 'ü -an yö, 'ö -sɔɔnkëdhe -yö -kë -a -ta bhë 'wo tɔɔ 'següme -nu, mɛ gbung -nu, 'segügüme -nu, -wo =suu'- 'oo =suu'- pö -mɛ -nu. ¹⁶-Sö 'gɔɔ- do 'ü -an yö bhë waa- wü -wo -dho =sɔɔnkëdhe 'ö bhë -a -san zë; -wo -dho -a -bha pë -nu 'wo- -gɔ -a 'ple kun -a -gɔ 'ö 'yö to ö bun 'kpaan 'ka. -Wo -dho -a =nëng -bhö 'ö 'wo- 'gü =siö 'siö 'ka. ¹⁷Bhii -Zlan -de =nɛ 'ö ö -de -dhi -a -dhë -wun -da -an =zuö' 'gü 'wo- -kë, 'ö 'wo dho wo 'kuë-, 'wo wo -bha -kɔ -mɔ 'wuën- -sü nu wü bhë -a -dhë, -yaan 'dho -yaan yöë -Zlan -wo -nu 'dhiö -mɔ 'kuë -yi -bha.

¹⁸-A -de, dhebɔ 'ü- yö bhë 'ö tɔɔ pödhe =va 'ö -gɔ -dhe kë -na -gludë -nu -ta 'kpongtaa.»

Babilonë 'gü -siö' -kɔ

18 ¹-Dhe 'ö =ya kë 'pö, 'a -Zlan -bha bɔmɛ do 'bhaa 'ö -kɔ -mɔ 'wuën- -sü =va 'dho -a -gɔ 'a- yö kö -yö 'go -na dhang- 'gü kö -a 'bhü =ya sa 'kpongtaadhë 'saadhö -bha. ²'Yö -gbla -wo 'gbee- 'ka =nɛɛ: «Babilonë -pö =va bhë -a 'gü =ya =siö'-! -Ka -dhe -ga, -a 'gü =ya =siö'-! -A -yadhë =ya kë zlöö -zuu yaa -nu këdhe 'ka. =Ya kë zlöö -ma =suu'- yaazë -nu 'ö 'waa 'slööslö -an 'saadhö -an këdhe 'ka. ³Bhii 'ö tɔɔ 'següme -nu 'saadhö -wa -drɔɔn 'ö- -bha =sɔɔn 'gblüünzë kë -sü 'ka bhë -a mü; 'ö 'kpongtaa -gludë -nu =wa wo -de =nëng -a -bha, -kë -dhuuzë -sü 'ka, -a 'piö. 'Ö 'dhɔɔdɔmɛ -nu 'wo 'kpongtaa =wa kë =bhɔɔzë, -a -bha pë =sɔɔng' =vavazë -nu 'gü.»

⁴'Go mü 'zü, 'ö -wo do 'bhaa -yö go dhang- 'gü 'a- ma, 'yö- pö: «-Ka 'go pödhe bhë -a 'gü, ma 'següme -nu! -Yö kë 'dhö kö -kun 'ka dho -da -a -bha =sɔɔn yaa -nu 'gü 'iin kö -kun 'ö 'klobhdhe -nu 'ö dho -ma -a 'ka bhë 'ö dho nu ka -ta 'pö. ⁵Bhii -a -bha =sɔɔn yaa -nu -lo 'ko -ta -sü -ta -ya 'dho =ya -lo dhang- 'gü; -Zlan -zlö yaa trö -a këyuö yaa -nu 'ka. ⁶-Kaa 'yënnng bho =nɛ -kɔ 'ö ka 'yënnng bho bhë -a 'dhö. Pë 'ö -kë kaa bhë, -kaa 'pë bho -a -gɔ -gwaa =plézë. -Kaa -bha yɔ -kɔɔ pa -yö kë 'gbee- -gwaa =plézë -yö ziëë -a mɛ 'ö- -yuö -kë ka -dhë bhë -a -ta! ⁷-Ka 'klobhdhe waa- 'yënnghödhe wo -a -ta =nɛ -kɔ do 'ö- =kaa' 'tɔɔhdhe waa- =naɔpë -nu 'gü bhë -a 'dhö. -Ya -pö ö -de 'gü =nɛɛ: «A -ya zö =nɛ -gludhe 'dhö. 'Maa =geandhe 'ka, 'ö n 'ka 'dho pë 'wo- -dhe ga -a dɔ 'gbeedhö.» ⁸-A -wun 'gü 'wun -nu 'wo 'dhoë- nu -a -ta bhë -wo -dho -ya -a -bha -dhekpɔɔyi do 'kpaan 'ka; 'ö tɔɔ ga 'dhö, ga -gbo -nu waa- din -nu. -A 'gü -dho =siö'- 'siö =kwaa'. Bhii kwa Dëmɛ -Zlan 'yö- -bha za kan bhë -a 'pii -yö 'gbee-.

9-Gludë -nu 'wo 'kpongtaa 'ö wo -nu 'wo =sɔɔn -kë 'iin 'ö 'wo wo -de nu -naɔpë -nu -bha -kë mɛ -gɔ -sü -dhë bhë, yi 'wo 'dhoë- pödhe bhë -a 'güö -sü 'sion -luu' -sü yöë bhë -a 'ka, -wo -dho 'gbo bɔ wo -de =maa 'ma -sü 'ka -a -wun 'gü. 10-'Wo -dho dɔ -a 'ka =gbiin 'suö 'ka, 'yënnghɔdhe 'ö 'dhoë- nu pödhe bhë -a 'gü -mɛ -nu -ta bhë -a -wun 'gü, 'ö 'wo- pö: <-Më 'yena -wun -nɛ -oo! 'Yena -wun -mlë 'ö =nɛ! O, Babilonë, pödhe =va 'piigbeezë! 'Lele do 'kpaan 'gü -wun 'yö ü 'klo bhɔ =nɛ =a!>

11'Dhɔɔdɔmɛ -nu 'wo 'kpongtaa -wo 'gbo bɔ -na wo -de =maa 'ma -sü 'ka -a -wun 'gü 'pö, bhii 'ö tɔɔ mɛ 'yaa pë gbe 'dho -an -gɔ gbo. 12Pë -nu =ya kë 'wo- dho bhë 'wo tɔɔ: 'Sënnɔ, 'wëü-, -güö =suu' -wungbeezë -nu, -zlɔɔ -nu, sɔ -sɛɛbɔ -nu, sɔ =suu' -bun nuɛazë -nu, 'lü =suu' -wungbeezë -nu, pë -nu 'wo- yan biö 'sɔn 'ka, -a mɛ -nu 'wo 'yan -sü 'ka 'lü =suu' -do 'bhaa =sɔnnɔ' 'gbeezë 'ka, -a mɛ -nu 'wo- yan zën 'ka, -a mɛ -nu 'wo- yan -piö 'ka 'iin -tɔn 'piö -guö =suu' -do 'wo- -dhe 'maablë, 13pë din -kë -së -pë -nu 'wo- -dhe kanelö waa- -a 'bhaa -nu; pë 'yi 'tëë -sëëzë -nu 'wo- -dhe 'miilö waa- -a 'bhaa -nu, 'güö -pë 'tëë -sëëzë -nu, -drɔɔn 'yi -nu, 'yɔn -nu, 'blee- ga waa- 'blee- -bi -nu, -du -nu, 'bhla -nu, =soo -nu waa- -yaa 'gü -pë, -wo -dho -dewo 'wo mɛ 'bhee- -nu 'dhɔɔ dɔ =nɛ =nua -nu 'dhö. 14'Ö 'dhɔɔdɔmɛ -nu 'wo bhë 'wo- pö pödhe bhë -a -dhë: <Ü -bha =naɔpë 'ü- 'piö -be kö 'ü ü 'yan dɔ -a -bha bhë -an 'plɛ 'gü =ya =siö-; ü -bha =bhɔɔpë -nu waa- ü -bha pë =sɔnnɔ' 'gbeezë -nu 'gü =ya =siö-! Ü 'ka 'dho -an yö gbo 'gbeɛdhö!> 15'Dhɔɔdɔmɛ -nu 'wo -kë -bhɔɔzë 'dhɔɔ dɔ -sü 'ka pödhe bhë -a 'gü, -wo -dho dɔ -a 'ka =gbiin 'ö 'yena -wun 'ö 'dhoë- kë pö- bhë -a 'gü -mɛ -nu 'ka bhë, 'ö- 'suö -yö -da -an 'gü. -Wo -dho 'gbo -nu bɔ wo -de =maa 'ma -sü 'ka 16-a pö -sü 'ka =nɛɛ: <'Öö, -më 'yena -wun 'ö =nɛ -oo; 'yena -wun -mlë 'ö -kë pödhe =va =nɛ -a 'ka =nɛ -oo! 'Ö 'dhu 'ö- wo sɔ 'biɔnbiɔn 'puu waa- -a nuɛazë 'ka, 'ö 'sënnɔ =baa' -pë -nu, -guö 'yanbhɔsüzë -nu, -zlɔɔ -nu -wo -kë -a -bha, 17'Ö 'lele do 'kpaan 'gü, 'ö =bhɔɔpë -nu 'wo- -gɔ 'saadhö bhë, 'ö- 'plɛ 'gü =ya =siö -nɛ =a!>

'Dhiö -sü 'yitagɔ 'dhasi -nu 'ka -mɛ waa- ö bha -dho 'tagüme -nu, 'yitagɔblüme -nu waa- 'yitagɔgüme -nu 'wo to 'töüdhö -wo -dɔ =gbiin, 18'wo 'kɔ -nu 'güö -sü 'sion -ga; 'wo yö =gblaa 'gbla -sü 'gü =nɛɛ: <Pödhe 'ö- =suu' -dho kë =nɛ pödhe =va 'ö =nɛ -a 'dhö yaa kë -dhö do!> 19'Wo -büö -bi -nu -lo wo -gɔ -ta, 'wo 'gbo -nu bɔ wo -de -maa 'ma -sü 'ka =woë' -nɛɛ: <'Yena -wun -mü -dhe =ɛ! Pödhe =va 'ö =nɛ 'ö- -bha =bhɔɔpë -nu bhë 'ö mɛ -nu 'wo 'yoo -ta 'yitagɔgüme -nu 'ka 'wo =kaa' -bhɔɔzë bhë 'yena -wun =ya kaa -dhe =ɛ! Bhii 'lele do 'kpaan 'gü -wun =yaa- 'plɛ 'gü =siö-!> 20'Dhang- 'gü -dhe, -bhö =zuögludhi kë, bhii -a 'gü =ya =siö-; mɛ -nu 'ö -Zlan -yö ka sü ö -bha 'ka, ka 'dhö, -Zlan 'dhiwopöme -nu 'dhö, waa- Yesu -bha bɔ -mɛ -nu, -ka =zuögludhi kë, bhii -Zlan =ya -a -bha za 'kan, -a -bha 'wun yaa 'ö- -kë ka 'ka bhë -a -wun 'gü. Za =yaa- 'kun, -a 'klo =ya bhɔ. »

21=Dhe =ya kë 'dhö, 'ö -Zlan -bha bɔme do 'gü 'gbeezë -yö -guö kpö do 'ö- -ta -yö -kë =nɛ 'blee- ga -wüü -a 'ka -guö kpö do =va 'dhö -a sü 'ö- -zuö

'yoo -bhaa -a pö -sü 'ka -næ: «-Kɔ do gia- 'ö -næ 'ö Babilɔnë -pö -va dho -zong'- -a 'ka kö -a 'gü -yaan -siö'-. 'Ö me gbe 'ka 'dho ö 'yan dɔ -a -bha gbɔ 'gbædhö. ²²Me gbe 'ka 'dho 'tan bho -wo -nu, kɔng zë -wo -nu, -bhɔng -piö -wo -nu waa- 'truu -piö -wo -nu -an gbe ma ü -plöö gbɔ. Waa 'dho -daan' -yuö -suu' -'oo =suu' -kë -mæ gbe yö ü -plöö gbɔ. Waa 'dho 'blee- ga zɔn -drinng ma ü -plöö gbɔ. ²³Labang yaa 'dho yö ü -plöö gbɔ. Waa 'dho dhe 'sü -sü 'iin -dho gwaan -sü -drinng ma ü -plöö gbɔ. Ü -bha 'dhoɔdɔme -nu -wo -kë mæ 'piigbeeze -nu 'ka 'kpongtaa, bhii ü 'següme -nu 'ple -püö ü -bha 'gina -nu kë -sü 'ka.

²⁴Babilɔnë -dhe 'klo -yö -bhɔ, 'ö tɔɔ -dhe bhë -næ 'ö 'wo -Zlan -wodhiölome -nu waa- mæ 'slööslo -nu zë -a -bha. Mæ -nu 'saadhö 'wo -an zë 'kpongtaa, -wo -an -yö mü.»

19 ¹Dhe -ya kë 'dhö, 'ö pë 'ö -kë -næ mæ gbung -va 'we -wo 'dhö 'a -ma dhang- 'gü, 'ö -pö -næ: «-Kwa -toëpö -Zlan 'tɔ bhɔ! Dhasü, 'tɔbhɔdhe waa- 'piigbeedhe -wo kwa -bha -Zlan -bha 'ka! ²Bhii -a -bha za 'kan -kɔ -yö 'wun gia- 'ka 'ö 'yö kpengdhö! 'Ö tɔɔ -ya -lo -sɔɔnkédhe -va bhë -a tuö. Za -yaa- 'kun, yö 'ö 'kpongtaame 'ple -gɔ 'gü -siö ö -bha -sɔɔn kë -sü 'ka bhë, -Zlan -ya 'klobhɔdhe -da -a -ta. -A 'klo -bhɔ -gen 'bhaa 'ö tɔɔ -Zlan -bha yuökëme -nu zë 'ö- wo bhë.» ³'Ö 'we -wo 'ö -kë -næ mæ gbung -wo 'dhö bhë 'ö -we 'zü -næ: «-Kwa -toëpö -Zlan 'tɔ bhɔ, bhii pödhe -va bhë -a 'güö -sü 'sion -yö -dho -luu' -toëpö 'ka!» ⁴'Ö mæ ziizii -nu 'gɔɔ- -ple ö ga -yiisië waa- pë 'bhee -nu -yiisië 'wo bhë 'wo -lo wo kɔn 'gü -Zlan 'ö -ya -sü 'ka 'gɔ -gbloo 'gü bhë -a 'dhiö 'ö 'wo- gba -woë' -næ: «Amen! -Dhe -kë 'dhö kö -kwa -Zlan 'tɔ kë -va!»

'Bhlanë -bha dhe 'sü 'wlaan-

⁵'Yö -wo do -yö go 'gɔ -gbloo 'gü -zian' 'yö- pö: «-Ka kwa Dë -Zlan 'tɔ bhɔ, ka 'saadhö 'ö 'ka- -bha yuökëme 'ka waa- mæ -nu 'ka -suö -a -dhë, ka mæ -va 'ka 'iin ka 'në 'tee 'ka!» ⁶'Go mü 'ö 'we -wo do 'ö bhɔ mæ gbung -va 'we -wo -bha -næ 'yiga -va -nu -zuö -drinng 'dhö, 'iin 'gbee- 'ka -næ dha 'we -wo 'dhö 'a- ma -næ: «Kwa -bha -toëpö -Zlan 'tɔ -yö kë -va! Bhii kwa Dëme 'ö kwa -bha -Zlan 'piigbeeze 'ka bhë -a 'tɔ -yö mæ -kɔɔn -na -gludëdhe 'gü! ⁷-Kwa -zuögludhi kë 'sönggö -sönggö, 'kwa- 'tɔ kë -va. Bhii 'bhlanë -bha dhe 'sü 'wlaan- yi -ya -lo. -A -bha dhebo -ya ö -de -baa'-. ⁸-Wogbiindhe -yö -nu -a -dhë, kö -yö ö 'dhu sɔ 'piɔnpion, 'bhü -sü 'go mü 'ö 'puu -a 'ka. Sɔ 'piɔnpion bhë -ya -zɔn këwun -nu kpengdhö 'ö -Zlan -bha 'següme -nu 'dho -a kë -na bhë -a 'ka.» ⁹Dhe -ya kë 'pö, 'ö -Zlan -bha bɔme -ya pö n -dhë: «-Bhö 'sëedhe 'sü, 'ü pë -ya -woë' -næ: -Zuögludhi -yö mæ -nu 'wo -an -dhɔɔ -kë 'bhlanë -bha dhe 'sü 'wlaan- -ta bhë -an -gɔ.» 'Ö kö 'zü 'ö- pö -næ: «-Wo bhë, -Zlan -wo giagia 'ö go -a 'dhii yö -mü.» ¹⁰'Yö 'a -lo n kɔn 'gü -a -gændhö kö 'aan- gba, 'yö- pö n -dhë: «Dɔ! Kö -kun 'ü- -kë 'dhö! Yuökëme -mü n 'ka 'pö -ne ü 'dhö, ü dheglu 'në gɔɔn- -nu 'ö pë -nu 'ö Yesu

-ya -kë bhë 'ö -kë -an 'yaan 'ö 'wo- -wun =blæ'- -mε 'ka bhë ka 'dhö. -Bhö -Zlan gba =zian!'» Bhii pë 'ö -kë -bin -sü 'ka 'ö Yesu -ya yö -dhegbeadhe 'gü bhë 'ö tɔɔ -Zuu 'slööslö 'ö 'wun -nu dɔ -na mε -nu 'dhii 'ö 'wo -Zlan 'dhi -wo pö -na -a 'ka bhë.

-Ya =soo 'puu =taa =me =bha =to =a 'gbee- 'ka =sü

¹¹Dhe =ya kë 'dhö, a dhang- -yö kö -a 'dhi =ya 'po, 'ö =soo 'puu do -yö -wo. Mε 'ö -kë -ya -sü 'ka -a =taa bhë -a 'tɔ tɔɔ «-Towotame»; 'ö- 'bhaa -yö -kë 'zü «'Wungiagia» 'ka; =ya za 'kan, -ya -kan -a 'kan -kɔ 'ka kpengdhö; 'iin =ya 'ko zë mε 'ka, kö -ya -zë 'wun gia- -wun 'gü. ¹²-A 'yan -yö -kë 'bhü -dhiadhö =ne 'siö 'dhö. 'Ö 'gɔ =gblaa' =plëzë 'dhoë- gɔ -bha. 'Tɔ do 'ö mε gbe 'yaa- dɔ -a 'ke yaa kë yö gia- -a 'ka -yö -kë -ya -sü 'ka -a -bha. ¹³Gblang 'ö fei -ya kun 'töüdhö bhë, (yö =ne 'ö- -zɔn zö =ne -ya =soo =taa =mε 'ö bhë =ya 'toë- 'gbee- 'ka ö yaagüme -nu -ta) -yö -kë -a -bha. Mε bhë -a 'tɔ tɔɔ -Zlan -wo. ¹⁴-Glu gbung 'wo dhang- 'gü -wo -kë -a 'piö; sɔ 'piɔpiɔn 'puu 'slööslö -yö -kë -an -bha 'ö 'wo -kë -ya -sü 'ka =soo 'puu -nu =taa. ¹⁵'Ö -dhaa 'dhiözë do 'yö dho 'següme -nu 'klo bhɔ -a 'ka 'yö go -a 'dhii. -Yö -dho 'dhiö sü -an 'ka -piö 'gblɔngblɔn do 'ka; 'yö dho lezen -kpa -nu =wüü'- lezen -kpa 'yi -bho -a 'gü -pë 'ö -Zlan 'piigbeezë -bha -naazuédhe 'gblüünzë bhë -a 'gü -pë 'ka bhë -a 'gü. ¹⁶Pë do 'ö -kë -a 'tɔ 'ka -yö -kë -ya -sü 'ka -a -bha gblang waa- -a -gen -an -bha =nε: «-Gludë -nu -bha -Gludë waa- dëme -nu -bha Dëme».

¹⁷Go mü 'zü 'a -Zlan -bha bɔmε do 'bhaa yö kö -yö -dɔ -sü 'ka lan- 'gü. 'Yö -gbla -wo do 'gbee- 'ka -ma -nu 'wo -kë ziö -dhia -an -dhë =nε: «-Ka nu 'ka 'dho ka 'kuëdhö -Zlan -bha -bhöpë =va 'ö =ne -a -ta! ¹⁸-Ka nu, 'ka -gludë -nu, 'dhasi -nu -gɔmε -nu, 'gü 'gbee- =mε -nu, =soo -nu waa- ö -ya -a =taa =mε -nu, mε -nu 'töüdhö 'wo 'gan 'gü 'iin 'waa 'gan 'gü -nu, mε =vava -nu 'iin 'në 'sɛɛn- -nu -an -bhö!»

¹⁹Go mü 'a wü 'dhö, 'kpongtaa -gludë -nu waa- wo -bha -glu gbung -nu yö kö =wa 'dho wo 'ko =bhaa -waan -glu -ya mε 'ö =soo =taa bhë waa- ö -bha -glu gbung -nu -an -bha. ²⁰Kε mε 'ö -kë =soo =taa bhë waa- ö -bha mε -nu -wo -to -a 'gbee- 'ka -an -ta 'ö wü 'ö bhë 'wo- kun 'gan 'ka. Yö 'dhö waa- -Zlan -wodhiölome =suazë 'yö -dhidhaapë -nu -kë wü bhë -a 'yan 'dhiö bhë 'wo -an kun. -Dhidhaapë -nu bhë =ne 'ö bɔ -a -ta 'ö mε -nu -püö; 'ö 'wo wü bhë -a -bha =duakëpë -ya -an -bha; 'ö wü bhë 'ö mε -nu -wa 'bin gba. Wü bhë waa- -Zlan -wodhiölome =suazë bhë -wo -to 'bhee- 'ka 'wo -an -zuö 'siö kpö -ta -dhe 'ö blɔɔn 'tëë yaazë 'dho 'güö -na -a -bha bhë -a 'gü. ²¹Kε mε -nu 'wo to -wo -ga -dhaa 'ö 'go -na mε 'ö -ya =soo =taa bhë -a dhiö bhë -a -kwa; 'ö -ma -nu 'saadhö -wo -an -glöö -kë wo -bha -bhöpë 'ka.

20 ¹Go mü 'zü 'a -Zlan -bha bɔmε do -yö kö -yö 'go -na dhang- 'gü -yö =yɔɔ' -na; -glu 'kpa 'dhi =va bhë, -a -yö -a 'dhiö -pë =lakele waa-

-yɔɔ' -bhüö =va do -wo -kë -a kwεε. ²Yö nu 'yö 'gina 'ö =mεε zii 'ka bhë, 'ö- kun. 'Gina bhë =ne 'ö tɔɔ dü 'wo- -dhe Satan. 'Yö- -lö -yɔɔ' 'ka -kwe -vuu do 'piö. ³Ö -Zlan -bha bɔme -ya -zuö -glu 'kpa 'dhi =va 'gü, 'yö- 'dhi ta, 'ö ö -bha -wogbiindhe =duakëpë to -a -bha, -yö kë 'dhö kö -kun 'ö dho 'sëgüme -nu bho zian -ta gbɔ -yö 'dho -yö yöë -kwe -vuu do bhë -a -lo -yi -bha. -Kwe -vuu do bhë =ya -lo, -wo -dho wo =kwa'- -a -zü 'töng pë 'tee -bha.

⁴Go mü 'a 'gɔ -gbloo -nu yö: Mε -nu 'wo -kë -ya -sü 'ka -a 'gü bhë -wo -kɔ -mɔ 'wuën- -sü yö kö -waan mε -nu -bha za 'kan. Mε -nu 'wo to -piö =kwa' 'Yesu -wun =blεε' -sü waa- -Zlan -wo -an -wun 'gü, 'ö wü 'ö bhë waa- -a 'bin 'ö waa -an gba, 'ö waa =duakëpë gbe -ya -an -kpong 'gü 'iin -an -kɔ -nu -bha bhë, a -an nii -yö mü 'pö, 'ö -kë -a 'gü -sü -yö nu -an -dhë, 'ö waa -Klito -nu 'ö 'wo -gludëdhe -kë -kwe -vuu do bhë -a 'piö. ⁵-Go ga 'gü -sü -blεεzë =ne bhë. Game -nu mε 'wo to waa 'dho go ga 'gü 'ö dho 'ö yöë -kwe -vuu do bhë -a ziö -sü -bha. ⁶-Zuögludhi waa- 'dhoë- -yö 'to mε -nu 'wo 'dhoë- go ga 'gü -blεεzë 'ka bhë -an -ta! Ga kë =ple -naa -kɔ 'ka 'dho -mɔ -an -bha gbɔ 'gbεεdhö. -Wo -dho kë -Zlan waa- Klito -an -bha slabhome -nu 'ka. -Wo -dho -gludëdhe kë Klito 'piö -kwe -vuu do bhë -a -bha.

-To -a 'gbee- 'ka Satan -ta -sü

⁷-Kwe -vuu do 'ö bhë =ya ziö, Satan -yö -dho go -kanso 'gü. ⁸-Yö -dho dho 'ö 'sëgüme -nu 'wo -lo -sü 'ka 'sε -to 'dhö -sü -ta, 'yö -an -püö; 'wo tɔɔ Gɔgö waa- Magɔgö. -Yö -dho -an -dhe 'ko =bhaa kö -waan -glu gɔn; -an -dho 'kuë- -sü -wo -dho kë =va =ne 'yënnng -nu 'dhö 'yoo 'kpong 'dhiö. ⁹-Wo =yɔɔn -na 'sε 'pian 'saadhö -ta; -wo =nië' -na -Zlan -bha mε -nu waa- -a -bha pödhe 'ö- -dho -ya -kë bhë -an -zü. 'Kεε 'siö -yö -dho go dhang- 'gü, 'yö -an 'gü -siö. ¹⁰Dü 'yö -kë -an -püö =dhia -be bhë, -yö -dho -zuö 'siö 'yipüë waa- blɔɔn 'tëë yaazë -an 'gü; -dhe bhë =ne 'ö wü waa- -Zlan -wodhiölome =suazë bhë 'ö =wa -an -zuö -a -bha 'dhiö 'saadhö. -An 'klo -dho bhɔ lënnng waa- gbeng -nu 'plε 'ka =toëpö 'ka.

Za -kaanta dɔ -sü

¹¹Go mü 'ö 'gɔ -gbloo 'puu =va waa- mε 'ö -kë -ya -sü 'ka -a 'gü bhë 'a -an yö. 'Sε waa- dhang- -wo -ziö 'wo go -a 'dhiö, 'ö mε gbe yaa -an yö gbɔ. ¹²=Dhe =ya kë 'pö, 'a game -nu, mε =vava -nu, mε 'sεen- -nu -an yö kö -wo dɔ -sü 'ka 'gɔ -gbloo 'dhiö. 'Ö mε do -yö 'sëédhe -be -nu 'dhi -po. 'Sëédhe -be do 'bhaa -yö -kë mü 'ö 'wo- 'dhi po 'pö. Yö =ne 'ö tɔɔ -kë -a 'gü -sü 'sëédhe -be. 'Ö game -nu -bha za -yö -kan pë -nu 'wo- -kë, 'ö -ya -sü 'ka 'sëédhe -be -nu bhë -an 'gü bhë -a -wun 'gü. ¹³Ö 'yoo -yö nu ö -bha mε -nu 'wo to -a -bhaa -an 'ka za dɔ -dhe =bhaa mü. 'Ö ga waa- =glööbɔɔdhe 'wo nu wo -bha game -nu 'ka mü 'pö. 'Ö -an -bha za -yö -kan pë -nu 'wo- kë -a -wun 'gü. ¹⁴=Dhe 'ö -an -bha za =ya 'kan, 'wo ga -de gia- waa- =glööbɔɔdhe -an -zuö 'siö 'yipüë 'gü. 'Siö 'yipüë 'gü -dhe bhë 'ö tɔɔ ga -kë =ple -naa. ¹⁵Me

'oo me 'ö- 'tɔ yaa kè -ya -sü 'ka -kè -a 'gü -sü 'sëedhe -be bhè -a 'gü, -a -zuö
'wo- wo 'siö 'yipuè bhè -a 'gü.

Dhang- -dëü waa- 'se -dëü

21 ¹Go mü 'a dhang- 'gü -dhe -dëü waa- 'se -dëü -an yö; kö dhang-
zii waa- 'se zii 'waa -dhö gbɔ, kö 'yoo gbe 'yaa -dhö gbɔ. ²Ö
pödhe 'slöösLö 'ö Zeluzalemë -dhe -dëü 'ka bhè, 'a- yö kö -yö 'go -na -Zlan
'piö dhang- 'gü -yö =yɔɔ' -na kö -ya kè -ne pè 'wo- pö dheɔ 'ö =ya ö 'dhu
-ne -dhe 'wo pö -a -bha, -a -bha -dho gwaan -yi -mü =dɛɛ -a 'dhö -a 'dhö.
³A 'we -wo do 'ö -kè 'gbee- 'ö go 'gɔ -gbloo 'gü =zian' 'a- ma 'yö- pö: «Dɔ
'kwa- wo zlöö =ne bhè, -Zlan -dho kè me 'bhee- -nu 'piö, =ya nu me 'bhee-
-nu ziën. -Zlan -yö -dho kè -an 'piö, 'wo -kè -a -bha 'segɔgümë -nu 'ka, 'ö yö
gia- 'ö -kè -an -bha -Zlan 'ka. ⁴-Yö -dho -an 'yënnng =dhuè'. 'Ö ga -sü -nu,
-wokpɔdhe -nu 'iin 'yënnngbhɔdhe -nu -an gbe yaa 'dho kè -dhö gbɔ, bhii pè
ziizii -nu 'wo bhè =wa ziö.»

⁵Ö me 'ö -kè -ya -sü 'ka 'gɔ -gbloo 'gü bhè, 'ö- pö: «Dɔ 'kwa- wo zlöö =ne
bhè, 'ma pè 'ple kè -dëü.» 'Go mü 'yö- pö n -dhè: «'Wun me 'ö bhè -a -ya;
bhii n -wo -nu 'wo bhè -wo 'wun gia- 'ka, 'ö -zo -yö -an -bha -sü -yö -an
-ma kun.» ⁶'Yö- pö 'zü: «=Ya yën, ma =ne 'a tɔɔ Alüfa waa- Omëga; 'a pè
-bleezë waa- pè 'dhiötodhe -an 'ka. Me 'ö 'yi mü -dho =yaa- 'kun, a -dho
-a gbaa -kè -a 'gü -yi 'ka 'kpaan. ⁷Me -nu 'wo 'dhoè- to -a 'gbee- 'ka, pè
-nu 'wo dho kè gbaɔ 'ka 'aan- kè -an -dhè 'wo bhè, 'go mü a -dho kè -an
-bha -Zlan 'ka -waan kè n gbö -nu 'ka. ⁸=Ya 'to me -nu 'ö -an -gɔ -ga 'yaa
-an 'dhiö -nu, me 'waa -Zlan -wo =bhlè -ya, me =lɔɔzë -nu, mezëme -nu,
=sɔɔnkëme -nu, me -nu 'wo wo -zo 'to -na bhè kèpè -nu 'piö -nu, me -nu 'wo
gbapè -nu gba -na waa- =suame -nu 'töüdhö, -an -bha kèdhe -yö -dho kè 'yi
'siö- 'puèè 'ö 'siö 'gü -dhe waa- blɔɔn 'tëè yaa 'gü -dhe 'ö ga kè =ple -naa 'ka
bhè -a 'gü.»

Zeluzalemë -dhe -dëü

⁹-Zlan -bha bɔme -nu 'slaple 'ö -Zlan -bha -wɔ me -ta -wun -kɔɔ 'slaple
'dho -an kwɛɛ bhè, -a me do -yö -nu 'yö- pö n -dhè: «-Bhö nu 'a 'bhlanë
-bha 'sü dhe -zɔn ü -dhè!» ¹⁰Ö -Zlan -bha bɔme -yö dho n 'ka -tɔn do
-gbiin tuö -Zuu 'slöösLö -kwaal'. 'Yö Zeluzalemë -pö 'slöösLö 'yö -kè go =dhia
dhang- 'gü -Zlan 'piö bhè 'yö- zɔn n -dhè. ¹¹-Yö -kè 'bhü -dhia -Zlan -bha
'tɔbhɔdhe 'ka. Pödhe bhè -a 'bhü -kɔ -yö -kè =ne -guö 'yanbhɔsüzë =sɔnnng'
'gbeezë -suu'- do 'wo- -dhe 'zasüpè 'kɛɛ 'ö- bun 'dhö 'bhlöngbhlöng -a 'dhö.
¹²Ö pè 'ö -kè =ne böü- 'kplong =va =gbiin 'dhö 'ö =niè -a -zü. 'Ö- 'dhi -nu
'dho 'gɔɔ- do ö ga =ple, 'ö -Zlan -bha bɔme 'gɔɔ- do ö ga =ple -wo wo -zo -kè
'kɔdhi -nu 'wo bhè -an 'piö. 'Ö- 'dhiö kpong -nu 'gɔɔ- do ga =ple 'wo bhè 'ö
Izlaelö 'gunng -gɔ 'gɔɔ- do ga =ple 'tɔ 'dho -ya -sü 'ka -an -bha 'dhö do do
'ka. ¹³Kɔdhi -yaaga 'ö- 'pian 'ö -dhö 'ö -a -ta. -A -yaaga -wo lan- 'go =zian';

-a -yaaga -wo kwa 'pian do -gɔ dhuo =zian', -a -yaaga -wo kwa 'pian do -go goo =zian'; 'ö -yaaga 'dho lan- -püo =zian'. ¹⁴Pödhe 'kplong bhë, -wa -gban -guö kpö 'gɔɔ- do ga =plɛ -ta. 'Ö -guö 'gɔɔ- do ga =plɛ 'wo bhë 'ö 'bhlanë -bha bɔmɛ -nu 'gɔɔ- do ga =plɛ 'tɔ 'dho -ya -sü 'ka -an -ta.

¹⁵-Zlan -bha bɔmɛ 'ö -kë 'wun -blɛɛ n -dhë -dhia bhë, 'sënnng 'lü 'në 'yö -kë pëdanpë 'ka -yö -kë -a kwɛɛ, kö -yaan pödhe bhë 'dhö, 'ö 'kodhi -nu waa- 'ö 'kplong -nu daan. ¹⁶Pödhe bhë -a 'pian -yiisië 'wo bhë, -wo -mɔ wo 'kuë 'kpodhö. =Dhe 'ö -Zlan -bha bɔmɛ -ya do dan 'ö -bha 'lü 'në bhë -a 'ka, -a 'kilong -yö -kë -vuu =plɛ 'ö -ta =plɛ. Pë do bhë 'ö- 'ka pödhe bhë -a -bha 'kɔ -nu 'pian 'plɛ 'piö. ¹⁷'Yö -Zlan -bha bɔmɛ -yö 'kplong bhë -a -ta dan. 'Ö -ta =duan' -yö -kë 'metrë 'gɔɔ- 'slaplɛ ga =plɛ. ¹⁸'Kplong 'ö bhë -wa -dɔ -guö =suu' -sɔnnng' 'gbeezë do 'wo- -dhe 'zasüpë bhë -a 'ka. Pödhe gia- -de 'gü -dhe -yö -kë 'sënnng 'bhlöngbhlöng 'ka =nɛ 'vedhe 'dhö. ¹⁹-Guö -nu 'wo -kë 'kplong bhë -a -gban -a -ta -pë 'ka bhë, -guö -sɛɛɔ -nu -wun =suu' -'gbeezë -nu -wo -kë dɔ -sü 'ka -a -bha. -A -gɛn =luu' -guö -blɛɛzë -yö -kë -guö 'wo- -dhe 'zasüpë ('ö -gbleibizë) bhë -a 'ka; -a kë =plɛ -naa -yö -kë safii, ('ö- bun 'dho 'budhazë) -a 'ka. -A kë -yaaga -naa tɔɔ agatö, 'ö- 'yan 'dho =plëzë. -A kë -yiisië -naa tɔɔ emelodö. (-Yö -kë -gbleibizë.) ²⁰-A kë 'sɔɔdhu -naa tɔɔ onikusö 'ö- 'yan 'dho =plëzë; -a kë 'slado -naa ('ö- bun -yö kë nuɛazë) tɔɔ 'saaduanö. -A kë 'slaplɛ -naa tɔɔ klizolitö 'ö- bun -yö -kë =nɛ zën 'dhö; -a 'sleaga -naa tɔɔ belilö ('ö- 'bhaa -nu bun -yö bhɔ 'budha -bha 'iin -gbleibi -bha). -A 'seisië -naa tɔɔ topazë ('ö- bun -yö -kë =nɛ 'siö 'dhö). -A 'gɔɔ- do -na tɔɔ klizoplazë ('ö- bun -yö -kë 'puu -gbleibizë). -A 'gɔɔ- do ga do -naa tɔɔ tuukwaazë (-yö -kë 'budhazë); -a 'gɔɔ- do ga =plɛ -naa (bun -yö nuɛazë =nɛ dha -bhüö -dhe nuɛazë 'dhö) 'wo- -dhe ametisö. ²¹'Kwɛɛ 'dhi 'gɔɔ- do ga =plɛ 'wo bhë 'wo tɔɔ -zɔɔga -nu 'gɔɔ- do ga =plɛ. Kpong -nu 'wo 'dhö bhë -a do -yö -kë -zɔɔga -nu 'wo bhë -a do 'ka; -kpinngga 'ö plöö mü -a -ta dhuö -dhe -yö kë 'sënnng 'puu 'ka; 'yö -kë 'bhlöngbhlöng =nɛ 'vedhe 'dhö.

²²N 'ka -Zlan -gba -a 'gü -kɔ gbe yö pödhe bhë -a 'gü, bhii kwa Dëme -Zlan 'piigbeezë waa- 'bhlanë -wo -dhe bhë -a -bha. ²³Pödhe -bha -wun 'yaa lan- 'iin 'su -an -bha kö -waan 'bhü -a -ta, bhii -Zlan -bha 'tɔbhɔdhe -yö -bhü -a -ta, 'ö 'bhlanë 'dho -a -bha =labang 'ka. ²⁴'Següme -nu -wo -dho 'ta sü -a -bha -dhepuudhe 'gü, 'ö 'kpongtaa -gludë -nu -wo nu wo -bha -bhɔɔpë -nu 'ka. ²⁵Pödhe 'kodhi -nu -wo -dho to 'po -sü 'ka. -An 'dhi 'ka 'dho ta, bhii 'bin 'më -sü yaa 'dho kë mü. ²⁶'Kpongtaame -nu -wo -dho nu wo -bha -bhɔɔpë waa- =bhlëyadhe -an 'ka mü. ²⁷'Kɛɛ pë -dhuuzë gbe 'ka 'dhö -da pödhe bhë -a 'gü, 'iin me 'ö- këpë -nu -wo -kë pë =ɔɔzë waa- =sua -wun =blɛɛ' -sü -an 'ka, wo 'ka 'dho -da mü 'pö. Me -nu 'wo dho -da mü, 'wo tɔɔ mɛ -nu 'ö -an 'tɔ 'dho -ya -sü 'ka 'bhlanë -bha 'sëédhe -be 'ö -kë -a 'gü -sü 'sëédhe -be 'ka bhë -a 'gü.

22 ¹-Kë -a 'gü 'yiga 'ö 'bhlöngbhlöng =nɛ pë 'wo 'vedhe kë -na -a 'ka =nɛ -a 'dhö bhë, -Zlan -bha bɔmɛ -ya -zɔn n -dhë. -Yö -kë 'go =dhia

-Zlan waa- 'bhlanë -an -bha 'gɔ -gbloo 'gü. ²'Yiga bhë -yö -kë ziö -dhia -kpinngga 'ö pö- ziën bhë -a 'piö. -Kë -a 'gü -lü -nu -wo -kë dɔ -sü 'ka -a 'kpong 'dhiö mü. -An bhe -nu -wo -ya -gwaa 'gɔɔ- do ga =plezë -kwe do 'gü. 'Su 'saadhö 'ka, -an bhe -nu -wo -kë. -A 'dhe -nu 'wo bhë =ne 'wo 'següme -nu -dhe bo. ³-Zlan 'ka 'dho 'dhangga -ya pë gbe -bha gbɔ.

-Zlan waa- 'bhlanë -an -bha 'gɔ -gbloo -wo -dho kë pödhe bhë -a -bha, 'ö -Zlan -bha yuökëme -nu 'wo dho -a gba. ⁴-Wo -dho wo 'yan dɔ -a -bha; 'ö -a 'tɔ dhö kë -ya -sü 'ka -an -kpong 'gü. ⁵'Bin -bha 'më -sü gbe 'ka 'dho kë mü, 'ö -an -bha -wun gbe 'ka 'dho kë -labang -bha -dhepuudhe -bha 'iin lan- -bha -dhepuudhe -bha, bhii 'ö tɔɔ kwa Dëme -Zlan -yö -dho 'ö -bha -dhepuudhe bhü -an -ta, 'ö 'wo dho -gludëdhe kë =toëpö 'ka.

Yesu -bha nu -sü

⁶'Go mü 'ö -Zlan -bha bɔme -ya pö n -dhë: «'Wun -nu 'wo bhë -wo 'wun gia- 'ka 'ö -an -dhe 'wun gia- -sü -ya -ma kun. Dëme -Zlan 'ö =ya kë 'ö 'ö -bha -Zuu -ya 'ö -wodhiölome -nu 'gü =ne -yö 'ö -bha bɔme -bɔ kö pë -nu 'wo nu -na bhë, -yaan -a -zɔn 'ö -bha yuökëme -nu -dhë.»

⁷Yesu -ya -pö: «-Bhö 'ü 'to 'to! A nu -na; =zuögludhi -yö me 'ö -Zlan 'dhi -wo 'ö go 'sëédhe =ne -a 'gü -a =bhlë -ya bhë -a -gɔ.»

⁸Ma Zan -me, -wo -nu 'wo =ne 'a -an -ma, 'ö pë -nu 'wo =ne 'a -an yö. =Dhe 'ma yën -a -bha, 'a -lo n kpɔn 'gü -Zlan -bha bɔme 'ö pë -nu 'wo =ne 'ö- -zɔn n -dhë bhë -a =geëndhö kö 'aan- gba. ⁹'Yö- pö n -dhë: «Kö -kun 'ü- -kë 'dhö! A -Zlan -bha yuökëme 'ka =ne 'ü 'dhö, 'ü dheglu -nu 'wo -Zlan -wodhiölome 'ka -nu waa- me -nu 'wo -wo 'ö 'sëédhe -be 'ö =ne -a 'gü 'wo- =bhlë -ya -nu, ka 'dhö. -Bhö -Zlan gba =zian!» ¹⁰'Go mü 'yö- pö n -dhë: «Kö -kun 'ö -Zlan 'dhi -wo 'ö -ya -sü 'ka 'sëédhe -be =ne -a 'gü bhë 'ü- -bin, bhii 'töng 'yö -ya pë -nu 'wo =ne -an -bha kë -yi 'ka bhë =ya yö -klöö'. ¹¹Me 'ö- këwun 'dho ya, -yö 'wun yaa kë -yö dhoë 'dhiö; me 'ö 'ö -de kun ya, -yö -de -kun yaa kë -yö dhoë 'ö 'dhiö; me 'ö- këwun 'dho -së -yö 'wun -së kë, -yö dhoë 'dhiö, me 'ö 'slööslö -yö 'dho -kë 'slööslö -sü 'ka 'dhiö.»

¹²Yesu -ya -pö: «-Bhö 'ü 'to to! A nu -na! A -dho nu ma me -nu =saan' 'ka; 'a dho -a dan me 'ö -dhö -a këpë -nu =tian' 'a- nu -a -dhë. ¹³Ma =ne 'a tɔɔ Alüfa waa- Omega; a pë 'ple züüdhe waa- -a 'dhiötodhe -an 'ka.»

¹⁴=Zuögludhi -yö kë me -nu 'wo wo -bha gblang -zlu, 'ö -an -dua' 'dho -mü kö -waan -da pödhe bhë -a 'kɔdhi gia- -bha -waan -kë -a 'gü -sü -lü bhe 'ö bhë -a -bhö -an -gɔ. ¹⁵'Kee pö- =taa -bha -dhe bhë 'ö tɔɔ me =lɔɔzë -nu, me -nu 'wo to 'gina kë -sü -nu 'piö -nu, =sɔɔnkëme -nu, mezëme -nu, -gbapë gbame -nu waa- me -nu 'wo =sua -kë wo -wo waa- wo kë -kɔ -nu 'ka -nu -an 'ple -an 'to -dhe.

¹⁶«Ma Yesu -me, 'a ma bɔme -bɔ ka -dhë kö -yaan pë -nu 'wo =ne -an =blec'- n -wun -dhe 'wun gia- -me -nu -dho 'kuë- -sü -nu -dhë. A Davidö =suu'- -ta 'gü -me 'ka; a 'susongga 'yö bhü -dhiadhio -a 'ka.»

17-Zuu 'slööslö waa- 'sü dhe -wa -pö: «-Bhö nu!» 'Ö me 'ö -ya -an -wo ma, -ya pö 'pö: «-Bhö nu!» Me 'ö 'yi mü -dho =yaa- 'kun -yö nu; me 'ö -kë -a 'gü -yi 'piö -yö -dho nu -a -dhë 'kpaan.

'Wun -gɔ dɔ -dhe

18 Ma Zan -mɛ, a- -pö ka -dhë -yö sia- -sü 'ka mɛ -nu 'töüdhö 'ö -Zlan 'dhi -wo 'ö 'sëédhe -be 'ö =nɛ -a 'gü 'ka- ma ka -dhë =nɛɛ: Me 'ö 'dhoë- 'wun 'bhaa -zuö 'sëédhe -be 'ö =nɛ -a -ta, -Zlan -yö -dho 'klobhɔdhe 'ö- -wun 'dho -ya -sü 'ka 'sëédhe -be 'ö =nɛ -a 'gü bhë -a 'bhaa -da -a -bha 'klobhɔdhe -ta. 19'Ö me =ya 'wun 'bhaa bho -Zlan 'dhi -wo 'ö -ya -sü 'ka 'sëédhe -be 'ö =nɛ -a 'gü bhë -a -ta 'pö, -Zlan -yö -dho -a -bha -kë -a 'gü -lü bhɛ sü, 'yö- bho pödhe 'slööslö 'ö- -wun -yö =blɛɛ -a -bha 'sëédhe 'ö =nɛ -a 'gü bhë -a 'gü.

20 Me 'ö pë -nu 'wo -ya zö =nɛ 'ö -gban -a -bha bhë -ya pö: «-Ii-, a nu -na!» -Yö kë =nɛ -kɔ bhë -a 'dhö! -Bhö nu Dëmɛ Yesu!

21 Kwa Dëmɛ Yesu -yö 'glusë kë ka 'saadhö ka 'ka! Amen!